

萬 有 文 庫

第一集一千種

王雲五主編

本 草 綱 目

(八十二)

張紹棠重訂

商務印書館發行

目 綱 草 本

(八十二)

訂重棠紹張

書 業 本 基 學 國

本草綱目

拾遺卷六

木部

響豆

池北偶譚樂安有孫公者年九十強健如四五十歲人自言生平惟服響豆每歲槐子將熟時輒令人守之不令鳥雀啄落既成即收作二枕夜聽其有聲者即響豆也因棄其餘如是數月而得響豆所在每樹不過一枚每歲不過服一粒如是者數十年無他術也

顏氏家訓庾肩吾常服槐實年七十餘目看細字鬚髮猶黑抱朴子云槐子服之令人補腦髮不白而長生殆即此歟

明目悅顏色開心志強筋骨補血髓

紀曉嵐先生姑妄聽之云響豆者槐實之夜中爆響者也一樹祇一顆不可辨識其法槐始花時即以絲網宵樹上防鳥鵲啄食結子熟後多縫布囊貯之夜以爲枕聽無聲者即棄去如是遞枕必有一囊作爆聲者取此一囊又多分小囊貯之枕聽如初得一響者則又分二枕如是漸分至僅存二顆再分

枕之則響豆得矣。

木蛇

百草鏡云。木蛇似蛇。有鱗甲。內紋黃色。如菊花瓣。亦奇物也。

治狗咬。

通香木

邊志。木長數尺。出塞外。以沸湯沃之。取其汁洗衣服。及灌一切花卉。灑屋宇壁。經年香氣不滅。燒之能降天神。香氣達數百里。契丹珍之。

治奇疾。人不知名者。服之即愈。焚之辟瘟疫穢氣邪祟。

閏月櫻皮

徽州者色紫爲上。救生苦海。櫻欄皮每歲只生十二瓣。逢閏月多生一瓣。惟此瓣中閒有界紋爲異。按詹氏小辨云。櫻每月生一片。歲生必十二片。唯當閏月之年。值所閏之月。則此一片僅有其大半。亦不成片。家有櫻園。每歲臘盡。剝之歷驗。此無中氣之徵也。據此。則閏月櫻皮。無全瓣者。○石室奇方。櫻欄遇閏年則生半片。歲長十二節。閏月增半節。

治血症。郭大林云。煨存性研。陳年者尤佳。服二三錢。試過效驗。王巽初云。用一瓣燒存性。作二服亦可。

南天竹

卽楊桐。今人多植庭除。云可辟火災。綱目木部南燭條。載其枝葉功用。云苦平無毒。止泄除睡。強筋益氣。久服長生不饑。變白卻老。并引上元寶經言。服草木之王。氣與神通。食青燭之精。命不復殞。皆謂指此。而於其尋常日用功用。概不著錄。至其所引附方。亦僅取聖惠方中之治風疾及誤吞銅錢而已。餘亦未之及焉。故悉補之。○王聖俞云。烏飯草乃南燭。今山人寒食挑入市。賣與人家染烏飯者是也。南天竹乃楊桐。今人植之庭除。冬結紅子。以爲玩者。非南燭也。古方用烏飯草與天燭。乃山中另有一種。不可以南天竹牽混。此說理確可從之。明目烏鬚。解肌熱。清肝火。活血散滯。食物宜忌云。南燭葉味苦性平。從新云。苦酸瀼平。

子。名紅杷子。

治八角蟲。同水銀搗爛擦之卽除。亦可浸酒去風痹。從新云。南燭子酸甘平。強筋骨。益氣力。

固精駐顏。子白色者。名玉珊瑚。

小兒天疔三奇方。用經霜天燭子臘梅花各三錢。水蛭一條。俱預收。臨用水煎服。一劑卽愈。

下疳久而潰爛。名蠟燭疳。不藥良方。紅杷子燒灰存性一錢。梅花冰片五釐。麻油調搽卽愈。

陰莖泄。慈航活人書。紅杷子燒灰存性一錢。加冰片五釐。麻油調搽。

三陰瘡。文堂集驗。南天竹隔年陳子。取來蒸熟。每歲一粒。每早晨白湯下。

解砒毒 劉霞裳云凡人食砒垂死者用南天竹子四兩搗水服之立活此方劉在松江府署親試驗者如無鮮者即用乾子一二兩煎湯服亦可

葉 洗眼去風火熱腫眵淚赤痛及小兒疳病取其葉煎湯代茶服○卻疫仙方行篋檢祕凡人稍覺頭疼身體酸困便即感冒寒邪急宜服此藥發散毋使傳經變成時疫此方經驗多人神效異常用烏梅紅棗各三枚燈心三十根南天竹葉三十片芫荽梗三段無芫荽以葱白三節代之亦可甘草麥冬各三錢小柴胡二錢水二鍾煎一鍾不拘時溫服微汗即愈

療癰初起 百草鏡南竹葉威靈仙夏枯草金銀花各四兩陳酒四壺隔水煮透一日三服半月除根每服藥酒須吞丸藥○丸藥方殭蠶一斤炒研砂糖和丸桐子大每次吞一錢

梗今人畫眉籠中置之可去烏風○作筋可治膈食膈氣

查克木

宦遊筆記塞外有查克木叢生樹高五尺許無皮枝幹清翠可愛葉似三春之柳然質甚堅並無柔條垂絲頗耐霜雪若伐以爲薪著火即燃形似炭有紅焰而無烟置徑寸於爐中歷一二日乃燼惟生於瀚海沙磧之地遇大風根株即拔因入土未深是以天扎無經久者○西北域記查克木產推河似絲柳而不垂無皮耐霜雪色青時入爐即燃數日乃燼然大者拱高者尋風斯拔之何者地沙且鹹根難

據而易朽也。

治產難。臨蓐之時。握其木。易產。心痛。燒灰服之。

綠益子

邊志出遼東。樹高丈餘。其葉兩兩相對。開花如蓋大。黃色。花謝結實。亦兩兩相對。大如木瓜。綠色。春生夏熟。人不可食。誤食之。入口卽齒落如屑。舌黑如漆。滿口裂碎。血出如水。終日不能食。經旬方止。又能碎骨如泥。彼處囊駝初生。取以潤其蹄。則千里可行。否則不能行。其性剛利如錐。舉而刺之。利如刀鋸。凡作角器。必用此。

性烈有大毒。能腐骨碎齒。入外科方術家用。

丁香油

百草鏡。丁香油出南番。乃用母丁香榨取其油。色紫。芳香辛烈。番人貯以琉璃器。蓋偶不密。卽香達於外。粵澳門多有之。○藥性考。丁香油出西番。○氣味甘辛。性大熱。透關竅。驅寒力更速於丁香。治胃寒痛。或滴少許入煎藥。或以油塗臍上痛處。○暖丹田。除水瀉。塗暖臍膏貼。解蟹毒。以一滴同薑湯服。揩牙。治口臭。○藥性考云。壯陽煖腎。疝痛陰寒。○按齊民要術。雞舌香卽母丁香。時珍所謂雄爲丁香。雌爲雞舌香也。丁香中雌者獨大。而可取油。雄者細小。不中榨取。予內兄朱放鵬。曾宦於粵。據云。丁香油

亦近時始有。其性熱而淫。凡衣飾器物。經染其氣。數日不滅。近日豪貴家。多珍之。爲房帷用。以色紫同玫瑰。滴水中攪之散。而復聚者爲真。僞者曰樟木油。色稍淡。紫中帶黃黑色。氣辛烈。觸鼻作樟腦氣。滴沐器洗衣。或入香佩。可以辟汗。不入藥用。綱目於丁香下附丁香皮及根枝。不及油。或其時尙未有。卽有亦未行入中土也。

塗臍散。臍痞。受寒胃痛。好酒和服。

金御乘云。胃寒呃逆嘔吐甚者。用丁香油擦透中脘。痛痺擦痛處。皆立效。試過極驗。
祝穆試效方。治瘰癧。化核膏用之。取其香烈直透經絡。辛以散結滯耳。

檀香油

藥性考。出粵中船上帶來。

味苦除惡。開胃。止吐逆。

肉桂油

百草鏡。粵澳洋船帶來。色紫香烈。如肉桂氣。或云肉桂脂也。或云桂子所榨。未知孰是。
性熱氣猛。入心脾。功同肉桂。

傳信方。治各種瘡。用燈草一莖。約長三四寸。以水稍潤。再以肉桂油塗之。貼背脊風府穴下。至肺俞止。

外以綿紙條封之。須臨發前一二時爲之。或先一日更妙。貼後次日發瘡更重。嗣後漸減。蓋風寒暑溼。盡爲提挈而然也。

水安息

出廣中。洋舶帶來。波斯交趾皆有之。形如荔枝而大。外有殼包裹。皮色亦如鮮荔枝。開之中有香。如膠漆。黃褐色。氣甚馥郁。此物如開用不盡者。須連外殼置盃中。方不走溢。否則遇五月黃梅時。其汁自滿。溢出殼外。雖殼內所存不過少許。亦會溢出。亦一異也。綱目安息香本條所言皆乾者。云是樹脂。集解下引葉廷珪香錄云。有如錫者。謂之安息油。卽是此種。瀕湖又未詳其功用。今時頗行。故采補以備用。其殼有絲毫裂縫。油卽走溢。須以瀝青熬化滴之。○百草鏡云。安息香有水旱二種。水安息難得。焚其香。旁置水盂試之。其香烟投水中。還結爲香。惟分兩稍減耳。○五雜俎云。安息香能聚鼠。其烟白色如縷。直上不散。

辛平無毒。通心神。除邪魅。辟蠱毒。止心痛。下鬼胎。入心經。通腎氣。尤益房宿。故龜靈劑用之以與陽。反魂丹用之以救急。然大耗真氣。凡氣虛挾火者不可服。忌見火。○藥性考。水安息香辛苦性溫。除風寒。霍亂。煖腎與陽。治心腹蠱氣。血淋遺精。鬼交鬼孕。薰勞瘵。

辟蠱丹。陳杰回生集。用紅棗二斤。茵蔯切碎八兩。大黃切片八兩。水安息五錢。合爲錠。每晨焚之。

種子二方。周氏家寶。潮腦飛升白霜一兩。麝香二錢。枯礬三錢。龍骨三錢。良薑三錢。五倍子二錢。明雄二錢。水安息母丁香酥合油各五錢。官桂三錢。輕粉二錢。紫梢花二錢。大山茨菰三錢。共爲細末。煉蜜爲丸。桐子大。蠟丸封固。月信後納一丸。次日再納一丸。種子如神。并治血淋白帶。陰瘡。陰蝕。楊梅瘡。毒等症。

又方。真川附子一箇。重一兩二三錢者。山茨菰四錢。此二味要重便浸透。焙乾研末。川烏八錢。五倍子三錢。此二味同研末。水安息五錢。生蟾酥八錢。此二味同研。不麻草烏五錢。明雄五錢。此二味同研末。官桂五錢。母丁香八錢。同研末。酥合油五錢。真鴉片三錢。同研末。紫梢花三錢。蛇牀子一兩。倭硫黃五錢。輕粉五錢。右藥爲末。同白芨五錢。煎水。合前藥打成錠。每行時用津磨少許。搽莖首。能治精滑。并久不生子。且能解毒。遇瘡不染。若早午晚各搽一次。久不斷。更有神效。與前方男婦同用更佳。或再加人參五錢尤妙。

穿腮起管。年久不愈。許氏方。用水安息搽之。管化毒愈。

夜蘭

嶺南雜記。產粵道旁小樹也。狀如木蘭。亦類紫薇。高一二尺。葉大如指頭。頗帶藍色。葉老則有白篆文。如蝸涎。名鬼畫符。葉下有小花如粟米。至晚香聞數十步。恍若芝蘭。又名蚊驚樹。暑月有蚊。折此樹逐

之卽驚散。○粵語。夜蘭木本高尺許。葉如槐。花如粟米。至夜則芳香如蘭。折之可以辟蚊。插門上。蚊不敢入。一名蚊驚樹。有病。取其葉生啖。或煎水。卽吐痰數日而愈。葉上有篆文如符。又名神符樹。○關涵嶺南隨筆。夜蘭生羅浮幽谷中。有香無形。與肉芝同爲神物。與此名同物異。○敏按粵志。步驚木。以嫩葉和米數粒微炒。煎湯飲之。可愈嘔瀉寒痰。花有幽香。步行遇之。往往驚爲蕙蘭。故亦曰步驚。永安人以嫩葉乾之。持入京師作人事。核其功用形狀。或卽夜蘭歟。

治一切風寒諸病。取葉煎湯服。少頃大吐痰涎。或行路侵寒暑。吐瀉危篤。採數葉嚼。或吐或不吐。病卽愈。

黎椒白胡椒。山胡椒。馬思答吉。

邊州聞見錄。川椒故有名。產自黎大所城隅者尤香冽。大小必雙。肉理細密。罅裂而子不墮。俗呼抱娃子椒。○四川志。各州縣多出椒。惟茂州出者最佳。其殼一開一合者尤妙。性同川椒。入藥尤效。

按黎椒近日亦罕有真者。外方所得。俱屬彼土人。以他產僞充。其功效亦僅與川椒相埒。據劉少府挹清云。真者含一二粒口中。可辟瘴毒。解魚蝦食毒。更可爲導淫具。彼土中有一種生惡瘡妓女。人不敢近。惟吞黎椒三粒與之接。則無害。次日便出椒。內盡包其毒。不入人臟腑也。故真者彼土亦珍貴之。罕

有出售於外者。

白胡椒

通雅云。廣舶胡椒。有一種玉椒。色白。味獨辛於他椒。今寧波洋貨店頗多。其色如雪。以內外通白者爲上。皮白內黃者劣。解魚蝦毒。入房術用。○蓬萊李金什言。洋船帶來白胡椒。據彼中人云。卽用胡椒之嫩者。生去其皮。曬乾卽如白玉色。非別有他種。物理小識。胡椒出番國。亦是蔓生。有白色者。或曰卽畢澄茄。

胃痛。百草鏡。用大紅棗去核七箇。每箇內入白胡椒七粒。線紮好。飯鍋上蒸七次。共擣爲丸。如綠豆大。每服七丸。溫滾水下。如壯實者。用十九丸。服後痛止。而胃中作熱作饑。以粥飯壓之。卽安。此寒食痰飲皆治。

治九種心疼。葉天士方。丁香去頂蓋。廣木香。雄黃。巴豆去油淨。白胡椒。各三錢。枳殼。紅花。五靈脂。各一兩。共爲細末。好酒發爲丸。如菜子大。候乾收貯瓶內。每服八釐。唾津送下。忌生冷油膩。半月除根。

白痧藥。種福堂方。白胡椒一兩。牙皂一錢。火消檀香末。明礬丁香。蟾酥各三錢。北細辛二錢。冰片麝香各五分。金箔量加。

山胡椒

百草鏡。雲南木邦土司。出一種山胡椒。色黑顆大。主止痛破瘀。

馬思答吉

五雜俎。出西域。似椒而香酷烈。彼土以當椒用。主開胃消食。破積除邪。

金剛纂

滇志。金剛纂花黃而細。土人植以爲籬。又一種形類雞冠。○湧幢小品。金剛纂生天目。其樹長不滿三四尺。多屈曲。雖春夏亦無葉。每觸其枝。曳裾不前。夷緬國有是種。相傳到其末漬水。水必毒。飲者立死。曰人瘴。又能借之爲誘淫之法。○張洪使緬錄。緬地有木曰金剛纂。狀如欒欒。枝幹屈曲。無葉。剉以漬水。暴牛馬令渴極而飲之。食其肉必死。○劉魁若程賦統會。雲南大侯州出金剛纂。青色如刺桐。最毒。○滇記云。金剛纂碧幹而蠟芒。孔雀食之。其漿殺人。以爲草者誤。今曲江建水石屏處處有之。性有大毒。入丹術家用。丹房本草。金剛纂純陽草也。伏硫。與柳葉藤同用。其功最神。

鍛樹皮

本草補。泰西有鍛樹。呂宋亦有之。其色紅。狀如杜仲。初因人取樹皮包切肉數瓣。抵家合成一片。始知其皮能合肉接骨也。因名曰鍛樹。本草人參條下所載椴木音賈。而此鍛音斷。不同。或係二種。當與有識者辨之。敏按椴葉與烏血柏相似。而大如團扇。有鉅齒。初生時可裹餅餌蒸食。霜後鮮赤若丹楓。照

耀岩谷。其皮柔韌如麻皮。烏喇之人采以治繩。作魚網。入水不濡。又可爲烏鎗火繩。中國所無也。

治折傷胎疝。一切損傷。肉破骨斷。取皮搗碎。煎酒服。又以渣敷患處。完好如初。幼兒患疝。由於胎中得者。此因皮開裂。腸入腎囊。疼痛難忍。亦能戕命。此葉久貼皮膜裂處。自然復合。永無患矣。但非幼童之年。則不可治。方用鍛樹皮。或搗爛。或削片。以油潤溼黏布上。貼患處。外以布牢繫腰間。或半年三箇月。方愈。

黃葛樹川樅皮

邊州聞見錄。蜀多黃葛。宜賓學宮前騎牆樹而生。根未至地。已合抱。此樹以某月種。每歲必某月始芽。入藥用根皮。藥肆中多取其皮以代川樅。○峨嵋山志。嘉樹在羅目縣東南三十里。陽山江。溉兩樹對植。圍各二三尺。上引橫枝。巨二丈。相援連理。陰庇百夫。其名曰黃葛。號嘉樹。蘇子由詩。予生雖江陽。未省到嘉樹。卽此。○益部談資。黃葛樹葉似桂。稍大。團欒蔭數畝。冬春不凋。幹則擁腫。根皆蟠露土上。至於石崖之側。則全欲不藉土生者。夔之梁方最多。惜無材用。○按王阮亭居易錄。雲南多黃果。似海棠。稍大者。香如佛手。甘脛如梨。多津液。蜀產者樹而不結實。其皮類川樅。亦能愈癬。今曰黃葛。或音之譌耳。

治疥癬。取其根皮煎湯浴之。

川槿皮

生川中。色紅皮厚。而氣猛烈。產孟獲城者。只一株。傳爲武侯遺植。殺蟲如神。生剝其皮。置蟻其上。卽死。今亦罕有。他省產者。名土槿皮。薄而氣劣。不得混施。今川人多用黃葛皮代之。以售他處。○通雅。真川槿皮。切斷。中有絲。白茸如杜仲。○羣芳譜。川槿色紅。氣厚力優。

癬瘡。楊起簡便方。癬瘡不愈。以川槿皮煎湯。用肥阜去核及內膜。浸湯時時擦之。或以汁磨雄黃搽尤妙。又見不藥良方。

頑癬多年不愈。○活人書。川槿皮二錢。輕粉五分。斑蝥七箇。大楓子七粒。河井水共一鍾。煎半。露一夜。筆蘸塗之。○又方。川槿皮四兩。輕粉雄黃各四錢。百藥煎四餅。斑蝥一錢。巴霜錢半。大黃二兩。海桐皮二兩。研如粉。陰陽水和。抓損敷之。必待自落愈。

荷葉癬。活人書。川槿皮切片。海桐皮檳榔各二錢。輕粉錢半。紅娘子五分。陰陽水浸一二日。用鵝翎掃上。如癢。以竹片刮破。搽此藥。夜露三宿。更妙。

遍身頑癬。大楓子四十九枚。川槿皮二兩。斑蝥去翅足五箇。川椒一錢。輕粉二錢。杏仁三錢。海桐皮二錢。共末。河井水各一盃。浸一夜。鵝翎蘸汁搽之。

癬瘡不愈。不藥良方。川槿皮煎湯。取肥阜去核及肉膜。浸湯內。時時搽之。

牛皮癬癩。毛世洪經驗集。川槿皮一斤。勿見火曬燥。磨末。以好燒酒十斤。加榆麵四兩。浸七日爲度。不時蘸酒搽擦。二三十年者。搽一年斷根。如無川槿。土槿亦可代之。○治頑癬。種福堂方。川槿皮。海桐皮。尖檳榔。樟冰。苦參。黃蘗。白芨。各二錢。雷丸一錢五分。大楓子。杏仁。各二粒。木鼈四箇。用酒浸七日。將穿山甲刮癬。少碎。以酒搽之。卽愈。○五仙散。經驗廣集。治久年頑癬。牛皮癬。神效。紅粉霜五分。明礬。川槿皮。杏仁。各一錢。蜜陀僧三錢。爲末。津調抹。一日三次。三日全愈。

粉刺。孫台石方。川槿皮一兩。硫黃二兩。杏仁二兩。去皮尖。輕粉二錢。樟腦五錢。麝香少許。爲末。雞子清調。早洗晚搽。

祕傳雄鼠骨散。治牙落。可以重生。用雄鼠骨一具。生打活。雄鼠一箇。剝去皮雜。用鹽水浸一時。炭火上炙。肉自脫落。取骨炙燥。入衆藥內。同研爲末。香附。白芷。川芎。桑葉曬乾。地骨皮。川椒。蒲公英。青鹽。川槿皮。旱蓮草。共爲末。擦牙。百日復出。固齒。無不效。

土漆

玉環志。皮如桃樹皮。黏著人手。卽發腫。若刀瘡見血。搗此皮敷之。卽止。

止金瘡出血。

水團花

李氏草秘。生溪澗近水處。葉如蠟梅樹。皮似大葉楊。五六月開白花。圓如楊梅。葉皮皆可用。

治金刃傷。年久爛腳瘡。搗皮葉。罨上一宿。卽癒。草秘。

麻櫪果

治胎疝。毛世洪經驗集。凡小兒初生發疝。止見啼哭。不見病形。延至一周兩歲。始知是疝。諸醫不效。用麻櫪樹上之鴛鴦果一對。其果連樹枝取下。可辨真假。一對果可治三人。荔枝核七枚。杵碎。平地木三錢。同煎飲。卽瘥。亦不復發。

千張紙

木蝴蝶

木實也。出雲南廣南府。形似扁豆。其中片片如蟬翼。焚灰用。

治心氣痛

按千張紙。滇志以爲木實。據程豹文言。千張紙乃仙人掌草。曬乾。其中心層層作羅紋。捲心折之。如通草狀。故名。此物用七張。燒灰酒服。可治胃脘痛。楊桐崗云。蘇州有之。狀如通草。約手掌大。曾用入丸中。可治浸淫惡瘡。今並存其說。以俟考。本草綱目。雜草內有宜南草。卽此。形狀亦同。云主邪。小兒女以緋絹袋盛。佩臂上。辟惡止驚。而不知其可服食也。

木蝴蝶

出廣中乃樹實也。片片輕如蘆中衣膜。色白似蝴蝶形。故名。四邊薄而明。中心微厚。不甚明透。似有子。壁錢白膜狀。

治肝氣痛。用二三十張。銅銚上焙燥。研細。好酒調服。○貼癰疽。項秋子云。木蝴蝶出廣西。儼如蝴蝶。中心如竹節。色更白。凡癰毒不收口。以此貼之。卽斂。

治下部溼熱。

風葉

稗史。柳之桂陽縣產風葉。充茗飲。能愈頭風。故名。亦可浸酒。性微熱。前人志記不載。性微熱。追風活血。可浸酒服。

拔爾撒摩

坤輿圖說。木名。出白露國。此樹生脂膏極香烈。可入藥。

傅金刃傷。一晝夜肌肉復合如故。塗痘不癩。塗屍千年不腐。

楓果

卽路路通。

卽楓實。一名攝子。乃楓樹所結子也。外有刺毬如栗殼。內有核多孔隙。俗名路路通。以金箔貼之。村嫗簪於髮。云可明目。宜老。出浙臨安縣。署後安樂山者。名錢墳楓果。最佳。焚之香郁。可燻衣辟瘴疫。綱目。楓脂香載其木皮。不及其實之用。今補之。宜於焚燒。未有入湯液之用。其果冬月卽孕。楓蠶子於中交。

春内生蠶。每果中有一箇。立夏後乃化蛾飛去。入藥取無蟲陳久者用。○槐西雜誌楓香果出雲南者。焚之殺鬼去邪。辟瘴溼。

辟瘴卻瘟。明目除溼。舒經絡拘攣。周身痺痛。手腳及腰痛。焚之嗅其烟氣。皆愈。熏衣被。可除蚤。敏按楓果去外刺。皮肉圓如蜂窠。卽路路通。其性大能通十二經穴。故救生苦海。治水腫脹。用之。以其能搜逐伏水也。

治癩。德勝堂傳方。楓木上毳十箇。燒灰存性。白砒五釐。共末。香油搽上卽愈。

臟毒。古今良方。路路通一箇。煨存性。研末。酒煎服。

咬人狗刺。臺。

臺灣府志。咬人狗其木甚鬆。手掐之便長條迸起。可爲火具。木高丈餘。葉長大似烟葉。有毛刺。刺人入毛孔甚癢。搔之發紅痛。一晝夜乃止。

治療癩。臺海使
槎錄

附刺暈。李氏草秘。其樹形似烏柿。有刺。刺人卽暈。故名。

治癰腫定疼。取樹腦葉入醬板鹽花。罨發背癰疽腫毒。痛甚者罨上卽止痛。不問已未潰。罨至愈。

桂子桂丁。
桂耳。
桂根。

學圃餘蔬。有一種四季開花而結實者。此真桂也。閩中最多。常以春中盛開。凡桂四季者有子。此真桂也。江南桂八九月盛開。無子。此木樨也。○臨海志。唐垂拱四年三月。月桂子降臨海。芳香有桂氣味。食之和暢。宋紹定閒。舒某於天台山得月桂子二升。大如樟子。無皮。色似白玉。紋如雀卵。中有仁。嚼之作芝麻氣。以之雜菊入囊爲枕。有散佚石縫中者。旬日輒出樹。葉柔長。經冬猶在。種入盆中。久之亦失所在。

性溫。味辛。平肝。煖胃。胃脘寒痛甚宜。○藥性考。甘辛溫中。煖胃平肝。益腎。散寒止嘔。

桂丁

百草鏡云。形如吳茱萸。出廣西交趾。乃肉桂子也。

治心痛。辟寒邪胃痛。百草鏡。桂丁研細。酒下三錢。

桂耳

出開化山中。乃多年老樹蒸出。蕈也。面紅色。土人採得。以治血疾。

治一切血症。及吐血。

按綱目分桂爲五種。曰桂。卽今所謂交桂。曰牡桂。今廣桂。曰箇桂。俗呼木犀。曰天竺桂。浙中山桂也。有子如蓮。曰月桂。四季有花者。此桂子乃天竺桂子也。綱目失載主治。若月桂則固載其子矣。曰桂丁。乃

廣桂之子。綱目亦不言其主治。至於桂耳。則各桂皆有之。性亦略同。綱目皆不載。悉爲補之。○和霽園夜談隨錄。呂司馬季琪。從司馬官嶺南署中。有小院頗幽靜。舊有古井在軒右。井畔有二老桂。大合抱。值夏夜。月光甚皎。琪納涼軒下。聞井中有聲不絕。凭欄窺之。見井水白如銀。中有紅丸。大如彈子。約數十百點。光明如火。向上競相跳躍。漸躍漸高。去欄僅尺餘。琪驚白司馬。次日命夫繩下探之。無他異。得桂子數十粒。鮮赤如新。琪卽戲以井水服之。日七枚。七日而盡。蓋適取得四十九枚也。後琪壽至九十九歲。無疾而逝。平原董太史曲江與琪善。親見而誌之。○敏按。今月桂子如蓮葯。鮮者色青。乾之淡黑色。呂琪所見。大如彈丸。鮮赤如新。當別是一種。考天地運度經云。太山北有桂樹七十株。天神青要玉女三千守之。其實赤如橘。人食之一年可以上昇。或是此種。惜琪公所服止四十九枚耳。故得壽。

桂根

陳年入土最深者。入藥用。

貼牙痛。可斷根。卽取桂樹根上皮用。

學齋咕嚕。花中惟巖桂四出。予謂土之生物。其數皆五。故草木花皆五。惟桂乃月中之木。居西方地。四乃西方金之成數。故花四出而金色。且開於秋云。

稷木

似檜亦名水松抱木生者性韌皮同乘鮮剝創造履俗稱抱香履潮州頗多能治溼腳氣辟邪風

樟皮梨

此香樟樹皮也綱目有樟材樟腦樟節而皮與子皆不及焉今山人率以皮子治病有效因急補之樹皮以年久老樟者爲佳治天行溫疫溼毒流注浴疥癬洗腳氣

心疼玉局方香樟樹皮取時去面上黑色者用內第二層皮擣碎煎湯服卽止永不再發刑杖傷神錦方樟樹皮用老酒燉出味調老公雞冠血食止痛散血立效

霍亂上吐下瀉傳信方樟樹皮一把水煎溫服立止

腳上生瘡家寶方此瘡個個如小筆管大者用樟樹葉牙咬熟略搽拔毒丹外貼樟樹葉連換卽愈敏按樟木綱目言辛溫香竄性能除溼故山居人患病多宜之象山縣志萬曆中邑大疫有一道人教人取千年老樟樹皮煎飲可愈并言樹老久飲霜雪其性轉清涼可消疫氣此卽藏器所云樟木能治惡氣中惡鬼疰之意

樟梨

卽樟樹子也出處州府遂昌縣福羅塢仙人壩周公園大者爲貴小者次之予友黃慶春與一遂昌人

相善。其人饋以樟梨。云可治心胃脘疼。服之立效。卽香樟子也。較他產者略大。蓋千年樟樹所結。故效如神。葉南郊自處州回。詢以樟梨。據云。此非子。乃千年樟樹所結於枝極閒者。如瘤然。土人以形似梨。故名之。然則此乃樟瘤也。然與予所見又不類。姑並存其說。以俟再考焉。

榕鬚

藥性考。榕葉似大麻。子如冬青。枝幹拳曲。木本棱凹。不成材器。而結奇香。其脂與漆相似。可以貼金。膠物勝於楮脂。○嶺南雜記。榕樹閩廣最多。他省則無。故紅梅驛以北無榕。大者蔭十餘畝。離奇古怪。備木之異。然體曲不中梁柱。理斜不中材用。質虛不中薪爨。莊子所謂以不材而壽者也。漳浦黃石齋先生有榕頌。其木年久者常結伽南香。焚之致鶴。植於水際。其子可以肥魚。細枝曝乾。束爲炬。風雨不滅。其脂乳可以貼金接物。與漆同。其鬚可入藥用。○說文以鬯爲古松字。六書故以古松字爲鬯。而鬯爲南方之榕。通雅云。榕當別出。狀木始於稽含。分字始於戴侗。柳宗元詩。榕葉滿庭鶯亂啼。後山叢談言。蔡州壺公觀有大木。四垂傍出。人莫能識。張戣閒人嘗至蔡爲余言。乃榕木。此木無用。惟枝上垂根。曝之可作火繩。以發炮。又可染黑。贊寧志所云。倒生木不死樹。橫枝生根。下地如柱。卽榕無疑。粵志榕之怪在根。自上生下。語曰。榕木倒生根。○粵志。榕葉甚茂盛。柯條節節如藤垂。其幹及三人圍抱。則枝上

生根。連綿拂地。得土石之力。根又生枝。如此數四。枝榦互相連屬。無上下皆成連理。其樹可以倒插。以枝爲根。復以根爲枝。故一名倒生樹。榦多中空不堅。無所用。離之木也。其象如離之大腹。其中空處常產香木。炎精所結。往往有伽南焉。粵人以其香可來鶴。子可肥魚。多植於水際。其樹脂可以貼金接物。與漆相似。性畏寒。踰梅嶺則不生。故紅梅嶺有數榕。爲炎寒之界。有紅白大葉小葉數種。○按泉州府志。榕有二種。一種矮而盤桓。其鬚著地。復生爲樹。一種名赤榕。上聳廣大。二種蔭最寬廣。入藥用有鬚者。

固齒。義復方。止牙痛。取榕根鬚。摘斷。入竹管內。將鹽塞滿。以泥封固。火煨存性。爲末。擦牙搖動者。亦堅。竹管不用。

欄七樹

治腹中虻痛。救生苦海。用欄七樹柴內。取之燒灰。研細酒下。或滾水下三錢。且能除根。破傷風。百草鏡。欄七樹刮去外面粗皮。取內白皮。搗爛酒煎服。渣和白麵。搗敷患處自愈。

柏癭

百草鏡。老樹生此。其狀如瘤。柏性西指。乃稟西方兌金之氣。故能平胃土而治胃痛。亦取其氣相攝服耳。

治胃痛。

柏子殼

綱目有柏實無子殼。近時奇功散用之。

解砒霜如神。集驗良方奇功散用柏子殼三錢炒紅土三錢同研爲末。用雞子清調服。服後作一寒顫即愈。重者不過兩服。

松毬

松皮膏

此卽山松所結卵毬。初青久則裂作鱗甲形。片片四開而墜。兒童拾之。盈筐攜入市。貨與茶爐代炭。能益茶味。入藥取青嫩者。綱目松下列松實。云見果部。不知果部乃海松子。出關東。與山松異。山松毬內老亦有子。細如粟米。不中食品。

白點風。家寶方。先以蔥花。椒。甘草三味煎湯洗。再以青嫩松毬。醃雞子白。硫黃同磨如粉。搽上。八九次除根。

松皮膏

色如琥珀。出西域伊犂等處。西域聞見錄。烏魯木齊乾隆四十年改爲迪化州。其土人取松皮爲膏。謂之松樹膏藥。

性溫。治血。一切虛怯勞瘵。婦女血枯血閉諸症。服之有效。

陳海曙家有此膏。自西域帶來。黑如漆。上蓋松皮一塊。云其松皮厚者二三尺。卽此皮所熬。曾以治勞嗽。十日病減。又十日而病痊。又十日而生肌。漸復如舊。每服三錢。空心白水調下。服一月。無不愈者。○槐西雜志。田耕野官涼州鎮時。攜回萬年松一片。性溫而活血。煎之色如琥珀。婦女血枯血閉諸症。服之多驗。親串家遞相乞取。久而遂盡。後予至西域。乃見其樹。直古松之皮。非別一種也。土人煮以代茶。亦微有香氣。其最大者。根在千仞深澗底。枝榦直出山脊。尙高二三十丈。皮厚者二尺有餘。奴子吳玉保嘗取其一片爲牀。意直盤古時物。萬年之名。殆不虛矣。

羅漢松實

物理小識。羅漢松闊瓣厚葉。樹老結實。長四五分。底平上銳。色紫黑。乾之可入藥。本草綱目所未載也。○永寧僧云。羅漢松葉長者名長青。能結實。葉短者名短青。不結實。其結實儼如佛。大者如雞子。小者如豆。味甘可食。

味甘補腎。其香益肺。治心胃痛。大補元氣。

汪連仕采藥書。羅漢松一名金錢松。又名徑松。其皮治一切血。殺蟲瘴癘。合蘆蒼香油調擦。

金松

物理小識出台州垂條結子如碧珠三年子乃一熟每歲生者相續瓊燦其間

子治腸風

山西柏油油松

其色黑若紫者係此油腳也其氣若松香竹箸挑之懸絲不斷者真殺壁蝨凡人家牀凡板壁患此者以油滴縫內其蝨盡死又搽禿瘡

治癬 集驗良方真柏油四兩黃蠟一兩雄豬膽一箇斑蝥三錢川椒去目并閉口者三錢先將斑蝥川椒二味研末聽用次將生柏油入砂鍋內熬極熟似有生烟之狀然後將蠟入油內鎔化再將豬膽汁傾入即離火將斑蝥川椒二味末子拌入用竹節急急攪勻將藥放在滾水盆上浸三日去火毒然後入瓷罐內封固聽用○治諸般癬多年近日癩毒生柏油一瓶塗患處後用年老枯桑柴火熏烤內有毒蟲即死待好即止如一次倘不瘳再熏即愈○又癬方經驗廣集真柏油調輕粉塗上起泡泡消即愈○治狗癬疹同壽錄用柏油不拘多少鐵杓內熬次下鴉鴿糞雞糞同和加香油少許擦之

治頭面耳上黃水瘡 活人書真柏油真香油各二兩同熬成膏搽上如神

赤遊丹 醫林集祕蜒蝥十條土蛛窠五六箇出草屋老壁內柏油舊漆器上刮下漆少許共搗以柏油調搽患處立愈

松油

其取油法。以有油老松柴。截二三寸長。劈如燈心粗。用麻線紮把。如茶杯口大。再用水盆一箇。內盛水半盆。以盃一隻。坐於水盆內。用蓆一塊。蓋於盃上。中挖一孔。如錢大。再以紮好松把。直豎放於席孔中間。以火點著。少時。再以爐灰週圍上下蓋緊。勿令走烟。如走烟。其油則無。候溫養一二時。其油盡。滴盃內。去灰蓆。取出聽用。一名瀝油。

治疥瘡久遠不愈。百藥不效。以此油新浴後擦之。或加白礬末少許和擦。更妙。

茶油卽榨樹子油。枯餅。

乃榨樹子油也。豫省閩粵皆食茶油。而不知爲榨樹子油。俗呼茶油。實非茶子之油也。煎熬不熟。食之令人瀉。

味甘性涼。氣腥色綠。潤腸清胃。殺蟲解毒。不宜生食。燃燈益目。抹髮解腫。

枯餅

藥性考云。餅能浣衣。除垢最潔。燒灰敷瘡。亦可下積。洗風瘙癢。可用皮葉。

杉木油

經驗廣集。有取杉木油法。用紙糊盃面。以杉木屑堆盃上。取炭火放屑頂燒著。少時。火將近紙。卽用鐵

筋抹去。燒數次。開盤看。卽有油汁在盤內。

治一切頑癬。先用穿山甲刮破。用羊毛軟筆蘸油塗上。甚加疼痛。停半日再塗。癬自結痂而愈。如已破者。不必刮癬。藥極多。都及不及。此真神方也。

清明插簷柳

清明日插在屋簷下。枯柳枝朝南者。入藥。物類相感志。清明楊柳。能止醬醋之潮溢。

甜瘡。濟世良方。以清明插過柳枝。燒存性一錢。銀硃七分。共研。再入飛礬一分。傅之。

小兒胎火不尿。濟急方。凡初生小兒。小便不通。乃是胎中熱毒未化。不可用寒涼金石之劑。只須取

清明插簷柳枝。朝南者一握。煎湯服之。卽尿。大人小便閉服之亦效。○治尿梗。周子象方。用清明插屋

簷下。枯柳一大把。折碎煎湯。傾坐桶內。被圍住熏。片時卽通。再內服。

白濁。盧復芷園臆草。清明所插柳條煎之。治白濁。蓋勢爲肝苗。柳爲卯木。同類也。渾濁之色。清明之氣。

相待也。用藥恰好有如此。

下痢後成醃魚水。此險症也。慈惠小編。用清明人家插簷柳。取葉來煎湯。下如止可救。起病不多日。下

醃魚水。年少者。方可治。老者難治。少者勞傷之症。肉而化成血水。平和調理。可以挽回十分之二三。老

者血氣久成衰弱。故此症。神仙難治。

柳椹柳屑
柳單

此乃柳花未放時。其枝垂下如椹形。所謂柳蕊也。淡黃色。若俟花出。則無用矣。綱目有柳華。無柳椹。別錄乃有柳實。或卽此歟。

明目驅風。壯筋骨。堅牙齒。响嘯神書。有柳椹牢牙法。以柳椹揩牙。去其宣露。諸風不生。明目駐顏。黑髮聰耳。壯筋力。益壽輕身。○急救方。柳椹陰乾爲末。日用擦牙。去風明目。烏髮固齒。久用不徹。可咀金石。柳屑

卽空心柳樹中屑也。

治濕氣腿腫。慈幼筏。淮陰卑濕。民多粗腿。偶得一法。治之甚效。用空心柳樹中屑。取出篩細。入鍋內炒熟。以臭泔水灑濕。又炒。加麵少許拌勻。趁熱取起。敷腿上。候水出再炒。敷數次自愈。

柳葷

陳氏筆記云。柳樹上葷也。煎服治心痛。

檉柳

俗名西河柳。性最透發。綱目檉柳下云。其枝葉消痞。解酒毒。利小便。不及治疹瘡之用。○宏治紹興府志。檉俗呼西河柳。其葉甚細。似桐而香。天將雨水。則生花。試之多驗。○本草匯。檉柳甘得土氣。鹹得水。

氣故能解血分之毒。消痞利便。是其本功。近世往往以治痧疹熱毒不出。用爲發散。不知本自何氏。○本草乘雅之檉柳。繆仲淳本草經疏廣之以治痧疹。此不獨取其能通。又取其象形。疹亦三顯三隱。三而三之。合爲九。烹以應九藏也。○芷園臆草。檉一歲三開花。一日三眠起。自成一家。不與四時之生長收藏相流行。超五行而純二氣。無殺機而唯生機者也。且雨以陰陽氣和而作。先知之應。從可知矣。第氣魄渺小。未可以大道載。靈樞陰陽二十五人之外。有陰陽五人。此當屬陰陽和平之人。又當啓陰陽自和之汗也。

逢原云。檉柳獨入陽明。故其功專發麻疹。兼解酒毒。去風煎湯洗浴。風症身癢效。

性平疏散。驅風解表。治斑疹麻瘡不出。經驗方。或因風而閉者。俱用西河柳葉。同櫻桃核煎湯洗之。卽透出。○救生苦海。草痧藥方用之。又肝天青蓮散用之。○急救方。治小兒痧疹不出。喘嗽煩悶。躁亂。用西河柳葉風乾爲末。水調四錢。頓服。立定。○疹後痢。從新用西河柳葉爲末。砂糖調服。○疹發不透。喘嗽悶亂。西河柳煎湯去渣。半溫。用芫荽蘸水擦之。但勿洗頭面。並忌夜間洗之。蓋痧疹晝發而夜斂也。乳母及兒。仍以西河柳煎服。

酒積成病。良方集要。西河柳晒乾爲末。每服一錢。溫酒送下。

桑癭鐵扇子。桑櫛櫛。桑葉滋。桑油。

百草鏡。桑老則樹生癭。其壯如瘤。用刀斫下。陰乾入藥。

去風痺諸濕。浸酒用。治胃痛。百草鏡

鐵扇子

百草鏡。桑葉採過二桑者勿用。止採過頭葉。其二葉力全。至大雪後。猶青於枝上。或黃枯於枝上。皆可用。須經大雪壓過。次日雪晴採下。線穿懸戶陰乾。其色多青黑色。風吹作鐵器聲。故名鐵扇子。冬至後採者良。

治腸風目疾。咳嗽盜汗。百草鏡。洗一切天行時眼。風熱腫痛。目澀眩赤。取鐵扇子二張。用無油茶盃一隻。

要有蓋者。置鐵扇子於中。以滾水沖半盞蓋好。候湯溫。其色黃綠如濃茶樣。爲出味。然後洗眼拭乾。隔

一二時。再以藥汁盃隔水頓熱。再洗。每日洗三五次。卽愈。此水一盞可洗三四十人。養素園驗方

中年眼目昏花。眼科要覽。復明散。用經霜雪桑葉。葉須臘月在樹不落者。同甘菊。側柏葉。荊芥穗。桑

白皮。如有眵淚。加艾葉。蒼朮。發癢加赤芍。川椒。爲粗末。等分和勻。煎湯。鷹洗。惟紅腫者不可洗。

風眼下淚。不藥良方。臘月不落桑葉。煎湯。日日溫洗之。或加入芒消少許。

桑槽楮

乃多年老桑。數被翦伐嫩條。其枝頭長成如拳者是也。

治膈症 梁侯瀛集驗方用老桑槽樅燒紅存性爲末好酒送下卽愈

桑葉滋

鮮桑葉摘開其葉筋有白汁名桑葉滋又名桑脂綱目桑葉載其用最廣獨未及此性微寒味苦有天絲入眼以此點之

山海草函桑葉滋點眼治蜈蚣咬

治乳癰 集聽用桑葉不拘頭二葉摘取半段取後半段脂三分黃蘗八錢水煎乾止用三分飯鍋蒸一次夜露一宿塗患處雖爛見骨者亦能收口平復

小石癰今人呼爲繫馬疔錢峻經驗單方云小石癰採二蠶桑葉滴下滋水點上愈○消癭瘤秋泉祕方用蝌蚪一錢蛇蛻泥球包煨爲末三分鬼饅頭滋乾一錢桑滋乾一錢乳香沒藥各三分麝香一分共爲細末飯和搗爲錠臨用時再取鬼饅頭滋化開以雞翎擦患處過宿卽消

桑油

萬氏家抄有取桑油法鮮桑木槌碎裝入瓶內用一瓶蓋口倒埋土中糠火煨之油自滴下貯罐聽用治小兒身面爛瘡輕粉雄黃各五錢豬膽一個滑石一兩硫黃五錢穿山甲十五片炙鳳凰退燒存性五錢爲末用桑油豬膽汁調絹包擦之

伽楠香

今俗作奇楠。乘雅作奇南。棧香棧木速香名。而廣人亦呼奇南爲棧。名同而香異也。粵海香語。伽楠雜出海上諸山。凡香木之枝柯竅露者。木立死而本存者。氣性皆溫。故爲大蟻所穴。大蟻所食石蜜遺漬其中。歲久漸浸。木受石蜜氣多。凝而堅潤。則成伽楠。其香木未死。蜜氣未老者。謂之生結。上也。木死本存。蜜氣膏於枯根。潤若錫片者。謂之糖結。次也。歲月既淺。木蜜之氣未融。木性多而香味少。謂之虎斑金絲結。又次也。其色如鴨頭綠者。名綠結。摺之痕生。釋之痕合。按之可圓。放之仍方。鋸則細屑成團。又名油結。上之上也。伽楠本與沈香同類。而分陰陽。或謂沈牝也。味苦而性利。其香含藏。燒乃芳烈。陰體陽用也。伽楠牡也。味辛而氣甜。甘香勃發。而性能閉二便。陽體陰用也。然以洋伽楠爲上。產占城者。剖之香甚輕微。然久而不減。產瓊者。名土伽楠。狀如油速。剖之香特酷烈。然手汗沾滯。數月卽減。必須濯以清泉。膏以蘇合油。或以甘蔗心藏之。以白萼葉莖之。瘞土數月。日中稍暴之。而後香魂乃復也。占城者。靜而常存。瓊者。動而易散。靜者。香以神行。動者。香以氣使也。藏者。以錫爲匣。中爲一榻。而多竅。蜜其下。伽楠其上。使薰炙以爲滋潤。又以伽楠末養之。他香末則不香。以其本香返其魂。雖微塵許。而其元可復。其精多而氣厚故也。尋常時勿使見水。勿使見燥。風徽濕土則藏之。否則香氣耗散。○本草乘雅云。奇南與沈同類。因樹分牝牡。則陰陽形質臭味情性各各差別。其成沈之本爲牝爲陰。故味苦厚。性

通利。臭含藏。燃之臭轉勝。陰體而陽用。藏精而起亟也。成南之本爲牡爲陽。故味辛辣。臭顯發。性禁止。能閉二便。陽體而陰用。衛外而爲固也。至若等分黃棧品成四結狀。肖四十有二則一矣。沈香有四十二品。第牝多而牡少。獨奇南世稱至貴。卽黃棧二等。亦得因之以論高下。沈本黃熟。固坎端櫻透。淺而材白。臭亦易散。奇本黃熟。不唯櫻透。而黃質遽理。猶加熟色。遠勝生香。燕炙經旬。尙襲襲難過也。棧卽奇南。渡重者曰金絲。其熟結生結。蟲漏脫落四品。雖統稱奇南結。而四品之中。又有分別。油結糖結蜜結綠結金絲結。爲生爲熟。爲漏爲落。井然成秩耳。大都沈香所重在質。故通體作香。入水便沈。奇南雖結同四品。不唯味極辛辣。著舌便木。顧四結之中。每必抱木。曰油曰糖曰蜜曰綠曰金絲。色相生成。跡迥別也。奇南一品。本草失載。後人僅施房術。及佩圍繫握之供。取氣臭尙爾希奇。用其形味。想更特異。沈以力行行止爲用。奇以力行止行爲體。體中設用。用中具體。牝牡陰陽互呈。先後可默會矣。○宦遊筆記。伽楠一作琪璠。出粵東海上諸山。卽沈香木之佳者。黃蠟沈也。香木枝柯竅露。大蟻穴其竅。蟻食石蜜。歸而遺香其中。歲久漸漬。木受蜜氣。結而堅潤。則香成矣。香成則木漸壞。其旁草樹咸枯。有生結者。紅而堅。糖結者黑而軟。瓊草亦有土伽楠。白質黑點。今海南人取沈速伽楠於深山中。見有蟻封高二三尺。隨挖之。則其下必有異香。南中香品不下數百種。然諸香賦性多燥烈。薰燒日久。能令人髮白血枯。惟伽楠香氣溫細。性甚益人。而范石湖桂海香志。獨不載及。詎不使寶鴨金猊之間。少一韻事乎。但佳者

近亦難得。○陳讓海外逸說。伽楠與沈香並生。沈香質堅。彫剔之如刀刮竹。伽楠質軟。指刻之如錐畫沙。味辣有脂。嚼之黏牙。其氣上昇。故老人佩之。少便溺焉。上者曰鶯歌綠。色如鶯毛。最爲難得。次曰蘭花結。色微綠而黑。又次曰金絲結。色微黃。再次曰糖結。黃色者是也。下曰鐵結。色黑而微堅。皆各有膏膩。匠人以雞刺木雞骨香及速香雲頭香之類。澤以伽楠之液。屑僞充之。○物理小識云。奇南與沈同類。自分陰陽。沈牝也。味苦性利。其香含藏。燒更芳烈。陰體陽用也。奇南牡也。味辣沾舌。麻木其香忽發。而性能閉二便。陽體陰用也。其品有綠結。油糖蜜結。金絲虎斑等。鋸之其屑成團。舶來者佳。○東西洋考。交趾產奇南。以手爪刺之。能入爪。既出。香痕復合。又有奇楠香油。真者難得。今人以奇楠香碎片漬油中。蠟熬之而成。微有香氣。此僞品也。

黎魏曾仁恕堂筆記。東埔寨。日本支國也。夜中不睹奎宿。國人多騎象。產奇楠。其取奇楠之法。國人先期割牲。密禱。卜有無。走密林中。聽樹頭有如小兒語者。便急數斧而返。遲則有鬼搏人。隔年始一往。取先上王及三儂。讀如馬。彼國專政之將軍也。重加洗剔。視上者留之。厚酬其值。次者下者。乃聽別售也。○查浦輯聞。榕樹千年者。其上產伽楠香。

金立夫言。盛侯爲粵海監督時。須上號伽楠入貢。命十三洋行於外洋各處購求。歲餘竟無佳者。據云。惟舊器物中。還有所謂油結。色綠。搯之痕生。釋之漸合者。今海外諸山。皆難得矣。卽占城所產。香氣輕

微久而不減。冬寒香藏。春暖香發。靜而常存者。是蜜結。嗅之香甜。其味辛辣。入手柔嫩而體輕爲上品。今時亦罕有。其熟結生結。蟲漏脫落四結之中。每必抱木。曰油。曰糖。曰蜜。曰綠。曰金絲。其生結者。紅而堅。糖結者黑而軟。或黃或黑。或黃黑相兼。或黑質白點。花色相生。成蹟迥別也。現在粵中所產者。與東莞縣產之女兒香柑。似色淡黃。木嫩而無滋膩。質粗鬆者。氣味薄。久藏不香。非香液屑養不可。不足寶貴。其入藥功力亦薄。識者辨之。味辛性斂。佩之縮二便。固脾保腎。入湯劑能閉精固氣。故房術多用之。不知氣脫必陷之症。可以留魂駐魄也。瀕湖綱目香木類三十五種。質汗返魂。尙搜奇必備。而獨遺此何歟。○藥性考。伽楠味辛。下氣辟惡。風痰閉塞。精鬼蠱着。通竅醒神。邪風追卻。十香返魂丹中。配藥以香。中帶辛辣。紅堅者佳。其次黑軟。至虎斑金絲。皆雜木性下品也。

藏奇南香。以錫匣貯蜜蘇合。鑿竅爲隔。則潤。若枯者用白萼葉苴之。瘞土數月。卽復。日中少暴尤香。忍溺法。物理小識。伽楠糖結末作膏。貼會陰穴。則溺不出。

特迦香

五雜俎。出弱水西。形如雀卵。色頗淡白。焚之辟邪去穢。鬼魅避之。博物志。載漢武帝焚西使香。宮中病者盡起。徐審得鷹嘴香。焚之一家獨不疫疾。卽此類歟。辟邪去疫。安魂魄。定驚悸。

氣結

出交趾真臘占城瓊海等處。單斗南云。此乃伽楠香樹中空腹內所結。藉伽楠芬烈之氣。得日月雨露之精。凝結而成。故名氣結。形亦同香塊。而酥潤鬆膩。不甚堅大。約伽楠得其質。此得其魂。亦如天生黃

出湯泉。爲硫氣熏結而成者。然頗難得。世不多見。

飛沈香

查浦輯聞。海南人採香。夜宿香林下。望某樹有光。卽以斧斫之。記其處。曉乃伐取。必得美香。又見光從某樹飛交某樹。乃雌雄相感。亦斧痕記取之。得飛沈香。功用更大。

此香能和陰陽二氣。可升可降。外達皮毛。內入骨髓。益血明目。活絡舒筋。

方輿志。生黎居五指山。山在瓊州山中。所產有沈香。青桂香。雞骨香。馬蹄棧香。同是一本。其本頗類椿。及樺柳。葉似橘。花白。子若檳榔。大如桑椹。交州人謂之密香。欲取者先斷其積年老根。經歲皮幹朽爛。而木心與枝節不壞者。卽香也。堅黑沈水者爲沈香。細枝堅實不爛者爲青桂。半沈半浮者爲雞骨。形如馬蹄者爲馬蹄。粗者爲棧香。

地蠟香

黃夢珠輪絕句云。石火平分地蠟香。註云。地蠟香出哈密。可辟蚤蝨。

金雞勒

查慎行人海記。西洋有一種樹皮。名金雞勒。以治瘡。一服即愈。嘉慶五年。予宗人晉齋自粵東歸。帶得此物。出以相示。細枝中空。儼如去骨遠志。味微辛。云能走達營衛。大約性熱。專捷行氣血也。

治瘡。澳番相傳。不論何瘡。用金雞勒一錢。肉桂五分。同煎服。壯實人金雞勒可用二錢。一服即愈。

臭梧桐

臭牡丹

生人家牆砌下。甚多。一名芙蓉根。葉深綠色。大暑後開花。紅而淡。似芙蓉。外苞內蓋。花白五出。瓣尖帶紅。霜降後苞紅。中有實。作紫翠色。○百草鏡云。一名臭芙蓉。其葉圓尖不甚大。搓之氣臭。葉上有紅筋。夏開花。外有紅苞成簇。色白五瓣。結實青圓如豆。十一月熟。藍色。花葉皮俱入藥。○周廷園云。臭梧桐一年三月十月兩次作花。若葉無紅筋。搓之不臭者。非。○學圃餘疏。臭梧桐者。吳地野產。花色淡。無植之者。淮揚間成大樹。花微紅者。縉紳家植之中庭。或云。後庭花也。獨閩中此花鮮紅異常。能開百日。名百日紅。花作長鬚。亦與吳地不同。園林中植之。灼灼出矮牆上。至生深澗中。與清泉白石相映。永嘉人

謂之丁香花。

汪連仕采藥書。秋葉俗呼八角梧桐。味臭。又名臭梧桐。取根皮搗汁如膠。爲土阿魏。能寬筋活血。化痞消癥。

羣芳譜。臭梧桐生南海及雷州。近海州郡亦有之。葉大如手。作三花尖。長青不彫。皮若梓。白而堅韌。可作繩。入水不爛。花細白。如丁香而臭。味不甚美。遠觀可也。人家園內多植之。皮堪入藥。采取無時。敏按臭桐與梧桐有家野之別。家生者成樹而高大。野生者本小不成樹。不過三四尺。花色粉紅。亦無大紅純白者二種。俱可入藥。功用亦相近。

治獨脚楊梅瘡。洗鵝掌風。一切瘡疥。煎湯洗汗斑。濕火腿腫。久不愈者。同菴閩子浸酒服。并能治一切風濕。止痔腫。煎酒服。貼臙瘡。搗爛作餅。加桐油貼。神效。

半支風。百草鏡。取葉連根掛於風頭廊下。吹乾。將葉燒灰入瓶內。每早服三錢。酒吞。○又邢虎臣驗方。用臭梧桐葉并梗。曬燥磨末。共二斤。用白蜜一斤爲丸。早滾水下。晚酒下。每服三錢。驗過神效。

治半邊頭痛。用川椒五錢。臭梧桐葉二兩。先將桐葉炒黃。次入椒再炒。以火酒灑在鍋內。拌和取起。捲在綢內。紮在痛處。吃熱酒一盃。取被蓋頸而睡。出汗即愈。

一切內外痔。○急救方。用臭梧桐葉七片。瓦松七枝。皮消三錢。煎湯熏洗。神效。

花。治風氣頭風。集聽。凡頭風。用臭梧桐花陰乾。燒灰存性爲末。每服二錢。臨臥酒下。三服無不愈。止痢。必效方。用隔年臭梧桐花煎湯服。卽愈。

葉。消腫脹疝。救生苦海。臭梧桐葉一百片。煎湯服三四次。

拄心疝。華玉先試效之方。臭梧桐葉。每歲用一片。共歲若干。葉若干。清水洗葉。用無灰白酒煎服。

外痔。黃氏醫抄。用臭梧桐葉煎湯洗。數次愈。

梧桐酒。經驗廣集。治內外一切乳毒。用臭梧桐。春夏取頭三個。秋冬取根搗爛。絞汁。對陳酒熱服。取汗爲度。神效。

豨桐丸。濟世養生集。此丸治男婦感受風濕。或嗜飲冒風。內濕外邪。傳於四肢。脈絡壅塞不舒。以致兩足軟痿疼痛。不能步履。或兩手牽絆。不能仰舉。凡辛勞之人。常患此症。狀似風癱。服此丸立能全愈。用地梧桐。俗謂臭梧桐。不論花葉梗子。曬乾切碎爲末一斤。豨薟草炒磨末八兩。二味和勻。蜜丸如桐子大。早晚以白滾湯送下四錢。忌食豬肝羊血番茹等物。或單用臭梧桐二兩。煎湯飲。以酒過之。連服十劑。其痛卽瘥。或煎湯洗手足亦可。

莖中蟲。治風毒流注。

臭牡丹

葉形與臭梧桐相同。但薄而糙。氣亦臭。五月開花成朵。一蒂百花。色粉紅。

洗痔瘡。治疔。赤水元珠。蒼耳臭牡丹各一大握。搗爛。新汲水調服。瀉下黑水即愈。

一切癰疽。淳安陳老醫云。用臭牡丹枝葉搗爛。罨之立消。

脫肛。祕方集驗。先將臭梧桐葉煎湯洗。後將浮萍草末搽上。不脫矣。應昌按。梧桐二字疑牡丹之訛。否則此方宜列入臭梧桐諸方。

之內。惜不得原書正之。

木八角 草八角

木高二三尺。葉如木芙蓉。八角有芒。其葉近蒂處有紅色者佳。秋開白花細簇。取近根皮用。○唐王周金盤草詩註。金盤草生甯江巫山南陵林中。其根一年生一節。人採而服。可解毒也。其詩云。今春從南陵得草名金盤。金盤有仁性。生在林木端。根節歲一節。食之甘而酸。風俗競採掇。俾人防急難。巴中地虺毒。解之如走丸。巨葉展六出。軟榦分長竿。搖搖綠玉活。裊裊香荷寒。世云酷暑月。鬱有神物看。天之產於此。意欲生民安。云云。味詩意。則似今之草八角。其性又能解蛇毒也。

苦辛溫。有毒。治麻痺風毒。打撲瘀血停積。其氣猛悍。能開通壅塞。痛麻立止。虛人慎用。

草八角

藥鑑。出於潛昌化深山中。葉角仰上。色黃。獨莖一葉。五六月開花。雙朵成對。粉紅色。下垂。根圓而不長。

俗名孩兒撐傘。○百草鏡云。草八角高尺許。根生疙瘩。獨莖一葉。入秋開花。只有兩朵相對。粉紅色。又名紅孩兒。結子紅色。成對如孩兒也。其根可以消毒。入藥得草本者良。根治癰毒。餘功同木八角。○葛祖方。性溫。治骨內之風。

按八角金盤有草木二種。木本者。其葉尖角仰起如盤之狀。葉背色黃。故曰金盤。草本者。葉尖角不仰。葉背不黃。微有分別。此藥性熱力猛。有毒。咀之味麻。雖壯實人亦宜少用。服藥後忌魚腥。猪羊牛馬等肉。犯之令人癲狂。惟白菜菔。應昌按。菜字疑萊字之訛。否則菜字下當補一萊字。可解。入藥用近根皮。酒煎服。取汗即愈。力弱者發戰作吐。病亦愈。咸孔昭云。木八角之鬚。乃麻黃。未知確否。

烏不宿

俗名老虎草。又名昏樹晚娘棒。梗赤。長三四尺。本有刺。開黃花成穗。其根下蟲。治風毒流注神效。○綱目有櫛木。名鵠不踏。與此別。

性熱。追風定痛。有透骨之妙。治風毒流注風痹。跌打勞怯。合保生丸。治虛勞如神。下胎催生。汪連仕采藥書。烏不宿又名烏不踏。又名刺根。白皮。性溫。行血追風。治紫雲風。大麻風。筋骨疼痛。濟世良方。婦人將產時。以烏不宿莖葉剉碎一大把。加甘草一錢。酒水各半煎。一大鍾服之。易產。且產後無病。其葉如杏葉。而枝梗有刺。烏不可宿。故名。又名石米刺。

跌躓。百草鏡。烏不宿根皮鮮者一錢。乾者七分。加入藥中煎服。取汗極妙。

難產。家寶方。烏不停葉一兩。甘草五錢。好酒二盃。煎一盃。或一次二次服。即產。

敏按。救生苦海云。茨梧桐。又名晚娘棒。多生山塢。最高者四尺許。皮色如桑。細者大如大指。老者大如甘蔗。若根曲而皮色紫者。非也。取根去泥。剝其白皮。搗汁。用二鍾。加米醋一鍾。清水半鍾。和勻。口中噙咽。可治雙單蛾。若喉閉。用鵝毛攪之。即開。噙咽如前。吐出痰涎三四盃。即能飲食如常。此乃以色紫者爲非晚娘棒。或同名而物異耶。存以備考。

破布葉

廣東通志。從肇慶新橋而上。人烟寥落。山路多歧。乃三縣交界之區。舟人及此險地。即燃夢香。客皆酣臥昏迷。遂被啓鑄。易貨財以礫塊。封識宛然。若枕間置水一盃。則迷藥皆渙散矣。又有藥名破布葉。可解行者歌曰。身無破布葉。莫上夢香船。按廣志註。夢香船中。以胡蔓草合香焚之。人即迷悶。解夢香毒能醒迷。

肇慶志。破布葉出陽江陽春恩平。狀如掌而綠。嶺南舟人多用香烟及毒水迷悶過客。以此草煎湯服之立解。

天成沙

生蘇木中劈破取之。但難得。須囑染坊陸續收存。不拘多少入藥用。
治卒心痛。救生苦海。以天成沙溫酒和服。治心痛神效。

淡竹殼

此乃淡竹嫩時所苞籜解下者是。綱目竹條止載慈竹籜。而淡竹略焉。不知其性能去目翳。功同熊膽。故爲補之。

此君丹治翳。一草亭眼科方。用淡竹殼不拘多寡。以布拭去毛。燒灰存性。每藥一錢。加麝香三五釐。同搗細末。點在翳上。最妙。

桃絲竹二黃

李氏草祕。諸癰瘡痘疔爛久不愈。用桃絲竹刮取二黃爲末。敷之。○降痰火。煎服。功勝淡竹茹。○治蛇咬天蛇毒。

王安採藥方。治發背不長肉。取桃竹茹作餅貼之。○血崩。取竹青炒末。水調服。

桃竹筍。治六畜瘡癰內蛆。煎湯洗之。卽絕。草祕○白濁。煎服卽愈。草祕

桃竹筍殼。治楊梅瘡。煨灰。酒調服。王安

竹衣

此乃金竹內衣膜。劈竹取鮮者入藥。

治喉啞勞嗽。張景岳古方因陣治一切勞瘵痰嗽。聲啞不出。難治者。服之神效。用鮮竹衣一錢。竹茹彈子大一丸。卽金竹青皮也。刮取之。竹瀝卽取金竹燒取。麥冬二錢。甘草橘紅各五分。白茯苓桔梗各一錢。杏仁七粒。去皮尖研。水一鍾半。加竹葉十四片。煎七分。入竹瀝一盃。和勻服。

枸橘

今之臭橘。山野甚多。實小殼薄。枝多刺而實臭。人多棄之。綱目枸橘條下。葉刺核樹皮俱收。而其實獨略。葉天士家抄本草。有主治。特錄出補之。入藥陳者佳。○橘錄。枸橘色青氣烈。小者似枳實。大者似枳殼。近時難得。枳實人多植。枸橘於籬落間。收其實。剖乾之以和藥。味與商州之枳。幾逼真矣。療子癰及疝氣。俱取整個枸橘。煨存性。研末。陳酒送服。

解酒毒。原蓬

胃脘結痛。取枸橘實煨存性。酒服方寸匕。內傷諸痛。以實醋浸熬膏貼。須久貼方不復發。以其力能破氣散熱也。

葉底紅

乃小木也。生山土。長不過一二尺。葉如石楠。四月生蕊。五六朵成簇。垂如脂麻鈴樣。花作青白色。六七

月結小子如天竺子。霜後色紅。儼如天竺子而大。俗呼矮脚樟。以其似樟葉而本短也。山人每掘之入市。售作盆玩。又名葉下紅。○李氏草祕。葉下紅一名平地木。長五六寸。莖圓。葉下生紅子。生山隕等處。治吐血。楊春涯經驗方。葉底紅即矮脚樟。用二兩洗淨。木槌搗爛。豬肺一個洗血淨。將葉入肺管內。河井水各三盃煮爛。至五更去葉。連湯食之。一二次愈。多食絕後患。

陶殿元語予云。某撫軍得宮傳祕方。治吐血勞傷。怯症垂危。久嗽成勞。無不立愈。曾經試驗多人。用平地木葉乾者三錢。豬肺連心一具。水洗淨。用白湯焯過。以瓦片挑開肺管。將葉包裹。麻線縛好。再入水煮熟。先吃肺湯。然後去藥食肺。若嫌味淡。以清醬蘸食。食一肺後。病勢自減。食三肺無不愈者。但所用乃平地木。與葉下紅有別。或一類相同。其性本通耶。

治偏墜疝氣。李氏草祕。搗汁沖酒服半盃。屢效。

茶樹根爛茶葉。經霜老茶葉。

綱目。茶子茶油俱載。惟茶根及爛葉經霜老茶葉未收。故補之。口爛。救生苦海。茶樹根煎湯代茶。不時飲。味最苦。食之立效。

爛茶葉

此乃泡過殘茶。積存磁罐內。如若乾燥。以殘茶汁添入。愈久愈妙。

治無名腫毒犬咬及火燒成瘡俱效如神搗爛似泥敷之乾則以茶汁潤溼抹去再換敷五六次全愈。
救生
苦海

痘毒。家寶方用泡過茶葉曬乾爲末五倍子各等分雞子清調敷。

諸毒努肉不退。保和堂祕方硫黃研細末敷上卽退再用後收口藥爛茶葉五錢烏梅三個燒灰共爲末敷上卽收。

經霜老茶葉

治羊癲瘋。家寶方用一兩爲末同生明礬五錢爲細末水法丸硃砂作衣每服三錢白滾湯送下三服全愈。

好吃茶葉。家寶方卽以茶葉入肉汁湯內飯鍋上蒸吃二三次卽不喜吃。

雨前茶

產杭之龍井者佳蓮心第一旗鎗次之土人於穀雨前採撮成茗故名三年外陳者入藥新者有火氣清咽喉明目補元氣益心神通七竅性寒而不烈以其味甘益土消而不峻以其得先春之氣消宿食下氣去噫氣清六經火。

下疳。外科全書雨前茶麻黃各一錢五分用連四紙方七寸許用鉛粉錢半擦紙上鋪前二藥捲成

筒子。火灼存性。研細。加冰片各一分。研勻用之。

偏正頭風。醫方集聽。升麻六錢。生地五錢。兩前茶四錢。黃芩一錢。黃連一錢。水煎服。○又治頭風。百發百中。赤白首烏各一兩。真川芎一兩。藁本二錢。細辛一錢。蘇葉一錢。此散邪方也。風寒甚者。可加川羌活。川烏服。以此散邪。不愈。便進後方。真兩前茶四錢。赤白首烏各二錢。北細辛四分。米仁一錢五分。炒牛膝八分。大川芎一錢五分。甘草五分。煎藥時。令病者以鼻引藥氣。服後宜密室避風。至重者四帖全愈。加金銀花二錢更效。若生過楊梅瘡者。加土茯苓四兩。煎湯煎藥。

肚脹。集聽。凡人肚脹不思飲食。用五虎湯治之。核桃。川芎。紫蘇。兩前茶。以上藥先煎好。好時加老薑砂糖在湯內。卽服。

三陰瘧。集聽。真兩前茶三錢。胡桃肉五錢。敲碎。川芎五分。寒多加胡椒三分。未發前入茶壺內。以滾水沖泡。乘熱頻頻服之。吃到臨發時。不可住。

不論新久諸瘧。慈航活人書。白芥子一兩。炒爲末。兩前茶和服一撮。瘧久者不過二次卽愈。

遠年痢。鳳聯堂驗方。臭椿皮一兩五錢。兩前茶錢半。扁柏葉二錢五分。烏梅棗頭各二枚。酒水各一盃。煎好。緩緩服。恐泛。

五色痢。慈惠編。陳年年糕。陳兩前茶。冰糖。茉莉花。共煎湯一盞。服之立愈。

消痰止嗽膏。米白糖一斤。猪板油四兩。雨前茶二兩。水四盞。先將茶葉煎至二盞半。再將板油去膜切碎。連苦茶米糖同下。熬化聽用。白滾湯沖數匙服之。

治痞。蜈蚣一條。用頂好細茶葉煎服。以身癢爲度。醫學指南又家寶方。治痞。陳年雨前茶一兩。枳殼三錢。

水煎。渣再煎。次日服。

傷寒無汗。彙集。用白糖雨前茶。入水熬數沸。服下。汗出卽愈。加生薑。又治紅白痢疾。

療猪癩羊兒瘋。陳氏筆記。用晉礬一斤。雨前茶一斤。爲末。茶汁米飲爲丸。每服四十九丸。發日前用

二服。茶送下。

風痰癩病。○生白礬一兩。細茶五錢。爲末。蜜丸。桐子大。一歲十九。茶湯下。大人五十九。久服。痰自大便

中出。斷病根。指南

風眼爛皮。眼科要覽。甘石童便。淬七次。黃連汁。淬七次。雨前茶。淬七次。出火氣。入冰麝研勻點。

頭風滿頭作痛。家寶方。川芎七錢。明天麻三錢。雨前茶一錢。酒一盞。煎六分。渣再用酒一盞。煎四五

分。晚服。過夜卽愈。

楊梅瘡。雄黃四兩。雨前茶四兩。生芝麻四兩。共爲細末。黃米磨細。粉糊爲丸。桐子大。每早白湯下三

錢。家寶

上清丸。蘇薄荷二兩。雨前茶白礪砂各七錢。烏梅肉貝母訶子各三錢。冰片三分。煉蜜爲丸。

風寒無汗。發熱頭痛者。用核桃肉葱白雨前茶生薑等分。水一鍾。煎七分。熱服。覆衣取汗。

氣虛頭痛。不藥良方。用上春茶末調成膏。置瓦盞內覆轉。以巴豆四十粒。作二次燒烟薰之。曬乾搗

細。每服一字。別入好茶末。食後絞白湯服之。立愈。

肩背筋骨痛。醫學指南。槐子核桃肉細茶葉脂麻各五錢。入磁罐內。二盃熬一半。熱服。神效。

五虎湯。治外邪在表無汗而喘者。麻黃三錢。杏仁去皮尖三錢。石膏五錢。甘草一錢。細茶一撮。有痰

加二陳湯。生薑葱水煎熱服。加桑白皮一錢尤效。醫學指南。

千盃不醉。乾葛橄欖細茶等分。爲末。逢半酣時。以茶服下。

普洱茶

出雲南普洱府。成團。有大中小三等。雲南志。普洱山在車里軍民宣慰司北。其上產茶。性溫味香。名

普洱茶。○南詔備考。普洱府出茶。產攸樂革登倚邦莽枝蠻崙慢撒六茶山。而以倚邦蠻崙者味較勝。

味苦性刻。解油膩牛羊毒。虛人禁用。苦瀉。逐痰下氣。刮腸通泄。

按普洱茶大者。一團五斤。如人頭式。名人頭茶。每年入貢。民間不易得也。有僞作者。名川茶。乃川省與

滇南交界處。土人所造。其餅不堅。色亦黃。不如普洱清香獨絕也。普洱茶膏黑如漆。醒酒第一。綠色者

更佳。消食化痰。清胃生津。功力尤大也。物理小識。普雨茶蒸之成團。狗西番市之。最能化物。與六安同。

按普雨即普洱也。

普洱茶膏能治百病。如肚脹受寒。用薑湯發散。出汗即愈。口破喉癩。受熱疼痛。用五分噙口。過夜即愈。受暑擦破皮血者。研敷立愈。

悶瘡。百草鏡云。此症有三。一風閉。二食閉。三火閉。惟風閉最險。凡不拘何閉。用茄梗伏月採。風乾。房中焚之內。用普洱茶二錢煎服。少頃盡出。費容齋子患此。已黑黯不治。得此方試效。

研茶

粵志。東莞人以脂麻蒔油。雜茶葉煮煎而成。

去風溼。解除食積。療飢。

龍脊茶

出廣西。亦造成磚。

除瘴解毒。治赤白痢。

安化茶

出湖南。粗梗大葉。須以水煎。或滾湯沖入壺內。再以火溫之。始出味。其色濃黑。味苦中帶甘。食之清神。

和胃。

性溫。味苦微甘。下膈氣。消滯。去寒濕。

湘潭縣志。茶譜。有潭州鐵色茶。卽安化縣茶也。今京師皆稱湘潭茶。

雪茶

出滇南。色白。久則色微黃。以盞烹淪。清香迥勝。形似蓮心。但作玉芽色耳。○平萊仲云。雪茶出麗江府屬山中。雪地所產。色白味甘。性大溫。祛寒疾如神。

甘苦性溫。治胃氣積痛。療痢如神。

敏按。雪茶出雲南永善縣。其地山高積雪。入夏不消。雪中生此。本非茶類。乃天生一種草芽。土人采得炒焙。以其似茶。故名。其色白。故曰雪茶。己亥臘。過餘杭。往訪劉挹清少府。啜雪茶。云。帶自雲南。茶片皆作筒子。如蜜筒菊蕊瓣樣。詢所主治。因言。此茶大能煖胃。凡嚴寒冰凍時。啜一盞。滿腹如火。若患癆損及失血過多之人。腹胃必寒。最忌食茶。惟此茶不忌。乃相與烹淪食之。果入腹溫煖。味亦苦冽香美。較他茶更厚。

大觀茶論。白茶自爲一種。與常茶不同。其條數闡。其葉瑩薄。崖林之間。偶然生出。非人力所可致。有者不過四五家。生者不過一二株。所造止於二三鎊而已。芽英不多。尤難蒸焙。湯火一失。則已變而爲常

品須製造精微。運度得宜。則表裏昭澈。如玉之在璞。它無與倫也。○東溪試茶錄。白葉茶。民間大重。出於近歲。園焙時有之。地不以山川遠近。發不以社之先。芽葉如紙。民間以爲茶瑞。

武彝茶

出福建崇安。其茶色黑而味酸。最消食下氣。醒脾解酒。○單杜可云。諸茶皆性寒。胃弱者食之多停飲。惟武彝茶性溫。不傷胃。凡茶癖停飲者宜之。

治休息痢。救生苦海。烏梅肉。武彝茶。乾薑。爲丸服。

松蘿茶

產徽州。本經逢原云。徽州松蘿。專於化食。○秋燈叢話。北賈某。貿易江南。善食猪首。兼數人之量。有精於岐黃者。見之。問其僕曰。每餐如是。已十有餘年矣。醫者曰。病將作。凡藥不能治也。俟其歸。尾之北上。將以爲奇貨。久之無恙。復細詢前僕曰。主人食後。必滿飲松蘿數甌。醫爽然曰。此毒惟松蘿可解。悵然而返。

姚希周經驗方云。凡患服羊肝者。忌服松蘿茶。以沙苑蒺藜煎湯代茶。

消積滯油膩。清火下氣除痰。

病後大便不通。吳興錢守和慈惠小編。用松蘿茶葉三錢。米白糖半鍾。先煎滾。入水盃半。同茶葉煎至。

一盤服之即通神效。

治頑瘡不收口。或觸穢不收口。梁氏集驗。上好松蘿茶一撮。先水漱口。將茶葉嚼爛。敷瘡上一夜。次日揭下。再用好人參細末。拌油胭脂塗在瘡上。二三日即愈。

羊兒瘋。集效方。好松蘿茶末八兩。生礬末四兩。米粥搗爲丸。臨發日清晨及常日。各服三錢。米湯下。水臃氣臃。彙集。服此藥。不忌鹽醬。一服立消。活魚一尾。重七八兩。去鱗甲。將肚剖開。去腸淨。入好黑礬五分。松蘿茶三錢。男子用蒜八片。女七片。共入魚腹內。放在磁器中。蒸熟。令病人吃魚。連茶蒜皆食。更妙。從魚頭吃起。就從頭上消起。如從魚尾吃起。即從脚上消起。立效。

繡毬風。活人書。五倍子炒。松蘿茶各五錢。研末。茶和敷。

黃病。劉羽儀驗方。生脂麻八合。好松蘿五合。砂仁二合。以上三味。先將脂麻研細。再另將茶葉烘脆。研。再將砂仁研。各爲細末。和勻。每日常服。如年久病深者。服到黃退乃止。如因好食茶葉者。成黃。此方不可用。

一切頭風兼熱者。王站柱不藥良方。蕞荻爲細末。用猪膽汁拌過。嗜鼻中。作嚏立愈。如兼溼者。以瓜蒂松蘿茶爲末。嗜鼻中。出黃水立愈。

治五癭。醫學指南。破結散。用海蛤通草昆布海藻洗膽草枯礬松蘿茶各三分。半夏貝母各二分。麥

麵四分爲末。酒調服。日三次。忌鯽魚猪肉。

治痢疾神方。核桃五個。帶殼敲碎。松蘿茶生薑糖各三錢。用水三盞煎。如紅痢用紅糖。如白痢用白糖。如紅白相兼。用紅白糖各一錢五分。煎服。重者連渣服。

五臟驗方。松蘿茶研末。雞毛管炒研各等分。每服二錢。白湯下。二十服全愈。忌鹽百日。

半身不遂。祕方集驗。白糖槐豆子化皮紅谷子松蘿茶各五錢。水三鍾。煎一鍾服。出汗卽愈。十日後。方可出門。

小兒牙疳。同壽錄。松蘿茶花椒去目。烏龍尾。食鹽各一錢。童便一鍾。水一鍾。煎湯漱口。口內含之。不可嚥下。

白濁。古今良方。車前草五六科。陳松蘿茶一二錢。燈心一二十根。三味煎服。止後。宜服水陸二仙丸以固之。

除瘟救苦丹。專治一切瘟疫時症。傷寒感冒。不論已傳未傳。百發百中。有力者宜脩合以濟人。陰德

最大。李炳文經驗廣集。天麻麻黃松蘿茶綠豆粉各一兩二錢。雄黃硃砂甘草各八錢。生大黃二兩。共爲細末。煉蜜爲丸。彈子大。收磁器內。勿令洩氣。遇症。大人每服一丸。小兒半丸。涼水調服。出汗卽愈。重者連進二服。未汗之時。切不可飲熱湯食熱物。汗出之後。不忌。

治爛眼皮方。種福堂方。用挂金燈淨殼。每殼一個。摻入研細透明綠膽礬二釐。或用殼十個。或二十個。裝套好。外用淨黃泥包裹好。勿洩氣。炭火煨至中閒。殼將成黑灰。存性。放地上。用盥蓋熄火。將中閒灰研細包好。放土地上一夜。出火毒。每用灰少許。放在茶杯內。以冷松蘿茶浸之。用薄棉紙蓋在茶面上。俟茶滲出紙面上。將此水洗眼皮。每日五六次。二三日即愈。

烏鬚方。吉雲旅抄。王守副家傳。烏鬚藥甚驗。用五倍子二錢。阜礬四分八釐。青鹽六分。紫銅末一分。五釐。榆香末六分。松蘿茶三錢。共爲末。蒸透用。

六安茶

張處士逢原云。此茶能清骨髓中浮熱。陳久者良。○年希堯經驗方。有異傳。終身不出天花法。用金銀花揀淨七兩。六安茶真正多年陳者三兩。共爲粗末。沖湯代茶。每日飲數次。終身不出天花。雖出亦稀。極驗。○千銀不易方。稀痘丹。用新拋羊屎一粒。六安茶一錢。甘草節二分。燈心二十七寸。赤黑綠豆各二十一粒。珍珠一分。銀簪一枝。洗淨油氣。水二盃。煎八分。溫服。

太上五神茶。經驗廣集。治傷風咳嗽。發熱頭痛。傷食吐瀉。陳細六安茶一斤。山查蒸熟。麥芽紫蘇陳皮厚朴乾薑俱炒各四兩。磨末。磁器收貯高燥處。大人每服三錢。小兒一錢。感冒風寒。葱薑湯下。內傷。薑湯下。水瀉痢疾。加薑水煎。露一宿。次早空心溫服。

消疽膏。廣集治一切疽仙方。松香官粉細六安茶各三錢。蓖麻仁去皮四十九粒爲末。先將蓖麻搗爛。然後入藥末搗成膏。如乾少加麻油搗勻。攤青布上。貼患處。再以棉紙大些蓋好。紮住。七日全愈。

普陀茶

定海縣志。定海之茶多山谷野產。又不善制。故香味不及園茶之美。五月時重抽者曰二鳥。苦澀不堪。產普陀山者入藥不可多得。

治血痢肺癰。

江西蚡片羅蚡

宦遊筆記。出贛州府寧都縣。製法與江南之蚡片異。茶疏。蚡茶不炒。甌蒸熟。然後烘焙。此指江南者言耳。出江西者大葉多梗。但生曬不經火氣。槍葉舒暢。生鮮可愛。其性最消導。貯飯一甌。以茶泡之。經半日。飯不加漲。而消少許。故飽食者宜飲此茶。別有一種極細炒蚡。乃採之他山。炒焙以欺好奇者。反非其真。然則茶亦不可以貌取也。花鏡。蚡片產吳興。似茶而實非茶種。味苦。性刻利。消宿食。降火利痰。虛人禁用。以其能峻伐生氣。

羅蚡

茶疏。長興羅蚡。疑卽古人顧渚紫筍也。介於山中。謂之蚡。羅氏隱焉。故名羅。西吳枝乘。湖人於茗不數

顧渚而數羅峴。顧渚之佳者，其風味已遜龍井。峴梢清雋，然葉粗而作草氣。嘉靖長興志：羅峴在互通山西土地廟後，產茶最佳。吳人珍重之。凡茶以初生兩前者佳，惟羅峴立夏開園，梗粗葉厚，微有蕭箬之氣，還是夏前六七日如雀舌者，最不易得。然廟後山西向，故稱佳。總不如洞山南向，獨受陽氣，專稱仙品，只數十畝而已。凡茶產平地，多受土氣，故其質濁。羅茗產高山巖石，純是風露清虛之氣，故可尚。○長物志云：浙之長興者佳，價亦甚高。今所最重，荆溪稍下。採茶不必太細，細則芽初萌而味欠足，不必太青，青則茶已老而味欠嫩。惟成帶葉綠色而團厚者爲上，不宜以日曬。炭火焙過，扇冷，以箬葉襯罌貯高處，蓋茶最喜溫燥，而忌冷溼也。

味甘，氣香，性平。滌痰清肺，除煩消臌脹。

治咳嗽祕方。醫學指南用川貝母茶葉各一錢，米糖三錢，共爲末，滾湯下。

水沙連茶

產臺灣，在深山中，衆木蔽虧，霧露濛密，晨曦晚照，總不能及，色綠如松蘿。每年通事於各番議明，入山焙製。

性極寒，療熱症最效，能發痘。

紅毛茶

臺灣志草屬也。黃花五瓣。根如瓜子。亦五瓣。根如藤。創取曬。或遇時氣不快。熬茶飲之。卽愈。治時氣腹脹。或悶鬱不舒。

角刺茶

出徽州。土人二三月採茶時。兼採十大功勞葉。俗名老鼠刺。葉曰苦丁。和勻同炒焙成茶。貨與尼菴。轉售富家婦女。云婦人服之。終身不孕。爲斷產第一妙藥也。每斤銀八錢。

味甘苦極香。兼能逐風活血。絕孕如神。

欒茶

范石湖集。脩江出欒茶。蓋石楠樹葉也。毛文錫茶譜云。湘人四月採楊桐汁作飯。則必採石楠芽作茶。乃能去風。

治頭風。

雲芝茶

宦遊筆記。山東蒙山在蒙陰縣城南三十里。高二十里許。周圍約三百餘里。產茶曰雲芝茶。土人售於市曰蒙山茶。然絕非茶類。乃山石中所生石衣。如苔蘚之屬。土人擲而沃之。冒登茗薺。○五雜俎。蒙山在蜀雅州。其中峯頂尤極險穢。蛇虺虎狼所居。得採其茶。可蠲百疾。今山東人以蒙陰山下石衣爲茶。

當之非矣。然蒙陰茶性冷，可治胃熱之病。性寒，能消積滯。綱目有石蕊，云性溫，不言消積滯。

紅花茶

出粵西，似紅花嫩苗爲之。土人製以贈客。宋鄒道鄉有詩。

消膈滯宿食，辟烟嵐瘴氣。

烏藥茶

出東莞，以脂麻、諸油雜茶爲汁煎之。

去風溼，破食積，療飢。應昌按：烏藥茶與前研茶製造主治皆同，未知是一是二。

瀘茶

四川通志：瀘州出，通呼爲瀘茶。

味辛性熱，飲之可以療風。

瘧茶

閩志：出福寧府。

治瘧。

樂山茶

茶譜。鄂州樂山出茶。黑色如韭。○又云。出鄂州東山。名東山茶。色黑如韭。性與韭相反。食之已頭痛。

拾遺卷七

藤部

雞血藤膠

產猛緬。去雲南昆明計程一月有餘。乃藤汁也。土人取其汁。如割漆然。瀘之般紅。似雞血。作膠最良。近日雲南省亦產。其藤長巨。蔓地上。或山崖。一莖長數十里。土人得之。以刀斫斷。則汁出如血。每得一莖。可得汁數升。彼處有店市之。價亦不貴。乾者極似山羊血。取藥少許。投入滾湯中。有一線如雞血。走散者真。○雲南志。順寧府出雞血藤。熬膏可治血症。○滇遊雜記。雲南順寧府阿度里地方。有一山。綵巨數十里。產藤甚異。粗類棹梁。細似蘆葦。中空如竹。剖斷流汁。色赤若血。故土人名之爲雞血藤。每歲端陽日。攜帶釜甑入山。斫取熬煉成膏。泡酒飲之。大補氣血。與老人婦女更爲得益。或不飲酒者。早晚用開水化服。亦能奏效。○按順寧刊售藥單云。順寧府順寧縣阿度吾山產此。又云。阿度吾里萬名山寺而生。伐之中。通細竅。汁凝如脂。煮之有香者。真。或云。兩種。一種爲雌。一種爲雄。應昌附注。

壯筋骨。已酸痛。和酒服於老人最宜。○治老人氣血虛弱。手足麻木癱瘓等症。○男子虛損。不能生育。及遺精白濁。○男婦胃寒痛。○婦女經水不調。赤白帶下。○婦女乾血勞。及子宮虛冷不受胎。○陸象咸云。曾見婦人合藥服之。多年不育者。後皆有子。○滇志。雞血藤膠治風痛溼痹。性活血舒筋。患在上部。飽食後服。在下部。空心酒服。不飲酒者。滾水調服。其色帶微綠。有清香氣。酒服亦能興陽。尤明府佩云。此膠治跌打如神。其太夫人一日偶閃跌傷臂。痛不可忍。用山羊血參三七治之。多不驗。有客教服此膠。沖酒一服。其疾如失。其性捷走血分可知。

順寧土人加藥料煎熬雞血膏。其煎膏之時。忌有孕婦看見。決熬不成。亦神物也。統治百病。能生血和血。補血破血。又能通七孔。走五臟。宣筋絡。治婦人經水不調。四物湯加減。八珍湯加元胡索爲引。婦女勞傷氣血。筋骨酸痛轉筋。牛膝杜仲沈香桂枝佛手乾木瓜穿山甲五加皮砂仁茴香爲引。大腸下血。椿根皮煎湯送下。男子虛弱。八味加減爲引。服此膠忌食酸冷。

吾杭龔太守官滇。帶有雞血藤回里。予親見之。其藤皮細潔。作淡黃色。切開中心起六角棱。如菊花樣。色紅。四圍仍白色。乾之。其紅處輒突出二三分許。竟成紅菊花一朵。亦奇物也。聞其藤最活血。暖腰膝。已風痠。戊申。長兒景炎在四川敘州府。與滇之昭通接界。因囑其往覓此藤。所寄來者。外形不殊。而中心惟作小紅點。乾之亦不突起。據來書云。實金沙江土司山中所得。然與龔太守所帶來者絕不相類。

豈此藤亦有二種耶。附記於此。以俟考。○辛亥予在臨安。患臂痛。胡春熙明府長君名什曾。宦滇南歸里。蒙贈雞血藤膠。皆方塊。每塊一二兩不等。外塗以蜃灰作白色。剖視其內。皆黑色如膏藥膠狀。云風癱痺痛有效。其外灰見水即脫去。據言其藤產騰越州銅壁關外新街所屬地。遍山谷皆是。新街守弁每歲輒命卡兵斫取熬膏。除餽遺各上司及僚友外。餘剩者轉市客商。販入中土。藉沾微利。以爲守資。渠所有即售自彼處也。外必以蜃灰飾之。庶久藏不壞。因帶歸以示兒子景炎。則又全非其所見。景炎曾館昭通大關司馬白公家。見其所藏雞血藤膠。猩紅成塊。儼如赤玉。光潤可愛。今胡公所贈。內作黑色。或係年久色黯。抑係新街所產。與大關有別。惜不能親歷其地。爲之細核。附筆於此。以俟後之君子考訂焉。

七金藤

性溫無毒。治中風痰迷。半身不遂。左癱右瘓。不省人事。痰涎上壅。攻心作咽。用一錢。白湯磨下。○小兒急慢驚風。大者五分。小者一二分。白湯磨下。立效如神。

鹿角藤

一名白毛刺。汪連仕方云。木本藤也。刺長傷人皮肉。立腫疼不休。又名不薪木。山人不斫。性大熱。氣臭。打痞積。治風氣如神。皆用根搗。共香糟罨之。

葉。蒸酒服。能鑽筋透骨。
子。食之。大能醉人。

買麻藤

職方典出肇慶。緣樹而生。有子。味苦可食。山行斷取其汁飲之。可以止渴。○粵志買麻藤其莖多水。渴者斷而飲之。滿腹已。餘水尙淋漓半日。性柔易治。以製履堅韌如麻。故名。言買藤得麻也。

治蛇咬。鮮者乾者俱效。

紅木香

紅皮藤部

一名廣福藤。又名紫金皮。立夏後生苗。枝莖蔓延。葉類桂。略尖而軟。葉蒂紅色。咀之微香。有滑涎。根入土。入藥用。須以水洗淨。去外粗皮。取內皮。色紅者用之。入口氣味辛香而涼沁。如龍腦。治風氣痛。傷力跌撲損傷。胃氣疼痛。食積痧脹等症。俱酒煎服。紫金錠中必不可少。

雷頭風腫痛貼痛法。紫金皮獨活赤芍白芷菖蒲葱頭煎濃如膏。調敷。藥到立止。如神。
汪連仕云。金谷香。今人呼緊骨香。卽紅木香。一名木臘。正名紫金皮。土產者功淺。入膏用。行血散氣。
紅皮藤

朱煥齋任城日鈔。錢塘門外道姑橋下有紅皮藤。凡患半肢風及大痲風者。取藤四兩。浸無灰酒一大

壺入鍋內隔湯煮三炷香。取起飲酒。量好者以醉爲度。每酒一盃。入藥酒三四匙。陸續飲至藥酒完。則風氣自愈。其風從指甲縫中出。對指尖以竹紙鋪几上驗之。紙能吹動。卽是指尖風出也。

雷公藤

生陰山脚下。立夏時發苗。獨莖蔓生。莖穿葉心。莖上又發葉。葉下圓上尖。如犁耙。又類三角風。枝梗有刺。○物理小識。犁頭刺藤。其葉三角如犁頭。多在籬邊生。可治癩癧。亦可截瘡。一名霹靂木。方勝板。倒金鉤。烙鐵草。倒掛紫金鉤。河白草。犁尖草。括耙草。龍仙草。魚尾花。三木棉。出江西者力大。土人採之。毒魚。凡蚌螺之屬亦死。其性最烈。以其草烟熏蠶子。則不生。養蠶家忌之。山人採熏壁蝨。

治臃脹水腫痞積。黃白疽。瘡疾久不愈。魚口便毒。癰瘡跌打。除壁蝨。莖燒牀下。一切毒蛇傷。萬病回春。云。凡被蛇傷。用板扛歸。不拘多少。此草四五月生。至九月見霜卽罕有。葉尖青如犁頭尖樣。藤有小刺。子圓如珠。生青熟黑。味酸。用葉搗汁酒調。隨量服之。渣罨傷處。立愈。

白火丹。救生苦海。用雷公藤五錢。平地木三錢。車前四錢。天青地白葉三。白草各三錢。煎服。○又洗方。雷公藤。河白草。煎浴。

水腫脹。救生苦海。平地木三錢。雷公藤五錢。車前草四錢。天青地白草三錢。路路通五個。打碎煎服。重者十服愈。

坐板瘡。秋泉家秘。烏賊骨五錢。雷公藤三錢。共爲細末。擦之。乾則以菜油調敷。
汪連仕方。蒸龍草卽震龍根。山人呼爲雷公藤。蒸酒服。治風氣。合巴山虎爲龍虎丹。入水藥魚。人多服卽昏。

治翻胃。噎膈。瘧疾。吐血。便血。喉痹。食積。心疼。虛飽。腹脹。陰囊腫大。跌打。閃肭。發背。疔瘡。乳癰。產後。遍身

浮腫。王安采藥方。

藤黃

綱目主治條下。祇言點蛀牙自落。無他治也。張石頑云。藤黃性毒。而能攻毒。故治牙蟲。蛀齒。點之卽落。毒能損骨傷腎。可知。葉氏得宜本草云。服藤黃藥。忌喫烟。按三黃寶蠟丸。黎峒丸。俱用藤黃。以其善解毒也。有中藤黃毒者。食海蜇卽解。○百草鏡。藤黃出外洋及粵中。乃藤脂也。以形似筆管者良。大塊者名牛屎藤黃。不佳。入藥取色嫩純明者。用水蒸化。濾去渣。盛瓷器內。隔水煮之。水少時再添煮乾。以三炷香爲度。以帛紮瓷器口。埋土中。七日取出。如此七次。曬乾用。○粵志。廣中產黃藤。熬汁卽藤黃也。性最寒。以青魚膽和之。治眼疾。間有白者。葉如土茯苓。身小而長。外有籜包。以莖浸水洗目。並無腫痛。性酸澀。有毒。治癰疽。止血化毒。斂金瘡。亦能殺蟲。治刀斧木石傷。及湯火傷。竹木刺入肉。一切諸傷。神效膏。用真麻油一觔。藤黃八兩。白蠟八兩。先將油入銅鍋。次將藤黃搥碎熬透。以麻布濾去渣。加

入白蠟。至滴水成珠爲度。貯瓷罐。其膏夏老冬嫩爲宜。敷之卽能止疼止血。收口取效如神。○金不換。
治跌打刀傷。〔蘇州周慎庵傳〕藤黃一兩。研細末。麻油四兩。白蠟五錢。黃蠟一兩。將二蠟入麻油內。銅杓熬化。取起放地上。一人徐徐下藤黃末。一人不住手攪勻。以盡爲度。卽成膏。敷於患處。用油紙攤貼。綢帕縛好。一、二日卽愈。

治一切無名腫毒。風氣膏。王站柱不藥良方。藤黃四兩。白蠟八兩。小磨麻油十二兩。先將油煎熟。將成珠。入水不散。再加黃白攪勻。瓷瓶收。面上仍以麻油養之。臨用攤貼。○祝氏效方。一筆消。用大黃二兩。藤黃一兩。明礬蟾酥各五錢。麝香乳香沒藥各二錢。用蝸牛搗爛作錠。遇小癩毒未出癩頭。以此醋磨新筆蘸藥圈外。愈圈愈小。圈毒消盡而止。○又一筆消方。治一切癰腫。雄黃膽礬砂藤黃銅綠皮消草烏各一兩。麝香二錢爲細末。和蟾酥爲條。如筆管大。金箔爲衣。用時以醋磨濃。新筆蘸藥塗毒四圍。數次卽愈。○消毒散。治癰疽疔毒。及初生多骨疽。良方彙選。大黃一兩。芙蓉葉曬乾爲末。五倍子各一兩。麝香冰片各三分。藤黃三錢。生礬三錢。共爲末。米醋調成如厚糊。塗於多骨疽之四週。中留一頭如豆大。以醋用鵝翎不時掃之。若不掃。任圍則無益。一日夜卽內消。其餘癰疽。亦以此敷之。神效。又方。雄黃二兩。麝香三錢。藤黃一兩。人中白五錢。硃砂白芨生白蘞各二錢。蟾酥一兩。共研末。用廣膠三錢。烱化和藥末爲錠。遇毒將此藥磨醋水塗之。○消毒方。治一切無名腫毒。及對口發背。

救生苦海。用滴花燒酒磨藤黃敷。不住手敷之。不至半日卽消。○無回丹。治一切疔癰腦疽。衆妙方。用鹼藤黃雄黃大黃各一兩。蟾酥麝香各二錢。血竭甲片炒各五錢。醋磨塗。立效。○移毒方。救生苦海云。如毒生在肢節穴道險要處。不成漏症。卽爲廢人。須用此藥。只塗半圈。卽移過一邊。用白芨白蘇三七五倍子大阜角山茨菰藤黃各等分。俱剉薄片。除藤黃餘皆入砂鍋內水浸一日。煎汁傾出。入水再煎。如此數次。濾淨熬膏。以藤黃將水蒸烱加入。攪勻再熬。入罈曬乾。用時以雞蛋清磨出濃汁。新筆蘸塗。又方。藤黃銀硃等分。醋和敷。趕毒至他處。出膿。如用穀樹汁調。可搽癬。一二次卽消。○大提藥方。圍毒初起。凡對口發背惡疽。四五日卽消。良方彙選。雄黃藤黃麝香各一錢。硃砂三分。蓖麻肉三錢。紅昇丹一錢五分。先將蓖麻研如泥。後和各藥研爛。用象牙匣封藏。外以虎皮包之。方不泄氣。種福堂提藥方。治諸毒不起。敷之立起。藤黃雄黃各三錢。蟾酥紅藥各二錢。冰片麝香各一錢。蓖麻肉一兩。先將蓖麻肉去皮。打如魚凍水。入諸藥。打成膏。瓷罐收貯。勿令洩氣。或云。宜紅藥三錢。冰片蟾酥勿用。止加麝香三分。辰砂一錢。又黃提藥方。鬱金雄黃藤黃各二錢。牛黃蟾酥硃砂冰麝各五分。巴豆肉八錢。蓖麻肉一兩。共搗爛。瓷瓶貯。遇症放膏藥上少許貼之。治一切惡毒。未成可消。已成用之。化腐。疔毒更妙。諸毒圍藥。祝氏效方。南星炒四兩。五倍子炒黑。白芨炒各二兩。藤黃薑黃炒各一兩。共爲細末。醋調塗。重者加牛黃一錢。鹿茸五錢。又種福堂方。無膿卽消。有膿卽潰。五倍子一兩。白芷

六錢。藤黃百草霜各三錢。生半夏生南星白芨陳小粉飛麵各四錢。共爲末。紅醋調敷。○箍毒。活人書。五倍子略焙一兩。藤黃四兩。銅青少許。小粉炒八兩。作錠。用時醋磨塗。○一切無名腫毒。藤黃五錢。五倍子二兩。白蜜葱頭各一兩。用米醋調圍患處。留頂勿敷。○五色蟾酥墨。能立消腫毒。雄黃銀硃膽礬韶粉藤黃銅綠礪砂各一兩。麝香一錢。共爲末。蟾酥爲條。如筆管大。水磨塗。

疔瘡。吳興楊氏便易良方。銀硃。蜒蚰。白甘菊。人中白。芋根內白心。雄黃。藤黃。大黃。共搗敷上。卽退。坐板瘡。仙遺拾珠。藤黃搗碎。用雄豬網油。青布一長條。將藤黃摻在網油之上。青布捲成條子。線紮緊。浸菜油內一夜。火燃取滴下油。杯積埋土中。一夜出火毒。塗瘡卽效。

五黃散。治一切頑癬。雞脚大黃。硫黃。雄黃。蠶黃。藤黃。各等分。爲細末。菜油調塗患處。七日勿洗浴。全愈。

金氏離洞膏。治臙瘡如神。萬應油五兩。藤黃一兩五錢。淨黃蠟二兩。共熬黑櫻色。攤貼。熬萬應油法。香油六十兩。以十六兩官秤作準。淨桃枝一兩。柳枝一兩。槐枝一兩。桑枝一兩。葱一兩。男髮四兩。花椒五錢。蓖麻二兩。馬前四兩。葦茺五錢。桂枝一兩。白芷二兩。夏浸三日。冬七日。春秋五日。然後熬至渣枯。去渣。每觔生油。熬熟汁得八折。此油凡一切膏藥。可作地子。

百草鏡云。俗名鐵邊箕。處處山野有之。葉似天薺冬葉。又似土茯苓葉。但差狹小耳。藤生。或緣石砌樹上。竹林內亦有之。非海金沙也。其根黑色。兩旁有細刺如邊箕樣。故名。入藥用根。敏按。今俗所用治一切喉症。金鎖銀開。乃天薺麥之根。形如纍丸。黏結成塊。產山上者。皮黃。汗泥中者。皮黑。與百草鏡所言各別。或名同而物異耶。○李氏草祕。天薺麥亦名金鎖銀開。形若薺麥。治乳癰風毒。入諸散毒藥內。取根二分。生薑一分。水煎服。愈。治敗血久病不痊。又洗痔血。皆佳。○李氏草祕。又云。小青草藤上蔓。有倒摘刺。細如稻芒。開粉紅花。生藍子。葉似薺麥。又名野薺麥。煎洗痔漏之聖藥。

治白濁用根。搗汁沖酒服。

喉中風火。○孫玉庭云。其根專治喉閉。故得此名。喉風喉毒。用醋磨漱喉。涎痰去而喉閉自開矣。

痰核癰癧。不拘何等癰瘡。結核初起者。梁湖陳府祕方。用金鎖銀開須鮮者。將來搗汁沖酒服。其莖葉用白水煮爛。和米粉作餅餌食之。不過二三服立消。若破爛者。以梁上烏龍尾揉去粗屑。納瘡中。外貼膏藥。亦服根汁。喫餅餌五六次。自結痂而愈。

洗痔漏。治蛇傷木蛇毒。搗汁和酒服。草祕

汪連仕采藥書。金鬚斜。俗呼金鎖銀開。其苗柔而堅性不斷。今名象毛。力能軟堅化痞。合米醋搗汁。鹽口。能開鎖纏喉風。雖枯根亦可透鎖喉。

乳藤

粵志。乳藤蔓如懸鉤倒挂。葉尖而長。斷之有白汁如乳。婦人產後以藤搗汁和米作粥食之。乳漣自通。○初生嫩條可食。其大實曰冬榮子。大如柚子。中有瓢。瓣瓣相疊。白如猪脂。炙食皆甘美。身懷數日。香不減。秋末冬初開。采以相餉。矜爲服食之珍。行血通乳。粵志○李氏草祕。乳汁藤。生山麓林中。高二三尺。葉似蒲萄子。藍色一叢。根皮掐之出汁如乳。爲諸乳毒癰瘡中之聖藥。

排膿散毒。生肌止痛。消腫益血。痛不可忍者。罨之卽止。已成未成。已潰未潰。始終皆不可少。李氏草祕汪連仕草藥方。乳門草卽乳汁草。又名土爛爛。性寒涼。行乳汁通氣。而能入血分。根止痢疾。細藤者卽遍地金。又名雞盲草。合雞肝蒸服。專治小兒一切疳眼。

蝙蝠藤

此藤附生岳壁喬木。及人牆茨側。葉類蒲萄而小。多歧。勁厚青滑。絕似蝙蝠形。故名。

治腰痛癢癢。

腰疼。澹寮試效方。用蝙蝠藤二兩。老人用三兩。酒煎服。二劑卽痛止。不可再服。若多服一劑。腰反傾倒不支。

皆治藤。

蔓延牆壁間。長丈餘。葉似泥藤。中暑者以根葉作粉食之。虛損者雜猪胃煮服。
無根草

采藥錄。此草無根無葉。生在柴草上。纏結而生。名無根金絲草。色有紫有黃。○百草鏡。無根金絲草一名大焰草。卽兔絲苗也。生毛豆莖上者佳。此草與女蘿相似。以色黃如金而細如線者真。若色紅紫粗類燈心者。名女蘿。又紫背浮萍。亦名無根草。與此別。○藥鑑。無根金絲草莖細而赤。葉無根。惟有青色細疊。附於莖際。蔓延極長。多纏草木上。其性涼。味微甘。利水治溼熱。三四月採。○李氏草祕。纏豆藤一名豆馬黃。無葉有花。子卽兔絲子。最治血解豆瘡毒。難產。酒煎服。

藥性考。金絲草無根葉。用苗。此藥功在涼血散血。故治癰疽腫毒諸症。味苦性寒。吐衄崩便。效略諸血。服之能止解諸藥毒。瘴癘疔癰惡瘡。○臺志。利水通淋。○葛祖方。治狐臭。騷氣。辟汗愈瘡。○百草鏡。治癰淋濁痢。帶下黃疸。預解痘毒。敷紅絲疔。

消毒保嬰丹。王之才醫便。凡小兒未出痘瘡者。每過春分秋分。日服一九。其痘毒卽漸消化。若只服一二次者。出痘稀少。若服三年六次者。永不出痘。此方屢驗。萬勿輕視。纏豆藤一兩五錢。其藤八月收取。毛豆莖上纏繞細紅絲。採取陰乾。以此爲君。妙在此藥上。黑豆三十粒。赤豆七十粒。山楂肉一兩。新升麻七錢五分。生地黃荊芥防風川獨活甘草當歸各五錢。連翹七錢五分。黃連赤芍藥桔梗各五

錢。牛蒡子一兩。硃砂另研。甘草同煮過去。甘草一兩五錢。苦絲瓜二個。各長五寸。隔年經霜者妙。燒灰存性。右藥爲極細末。砂糖拌勻。共擣千餘下。丸如李核大。每服一九。濃煎甘草湯化下。其前項藥預辦精料。遇春分秋分。或正月十五日。或七月十五日。修合。務在虔誠。忌婦人雞犬貓孝服見之。合藥須淨室焚香。向太陽祝藥云。神仙真藥。體合自然。嬰兒吞服。天地齊年。吾奉太上老君急急如律令勅。一氣七遍。

慈惠小編。治小便不通。諸藥無效。○金絲草一握。同韭菜根頭煎湯洗小肚。卽通。金絲草多附黃豆。莽上無根無葉。細絲如椶色。近水灘諸樹上皆有之。

麥裏藤

各麥地皆有。臨安縣鄉間尤多。四月採之。莖纏麥上。葉類神仙對坐草而略尖。微有毛。葉對節生。莖細。節微紫。葉小者佳。葉大者無力。

跌撲。張氏傳方。以乾者一錢。酒煎服。

白毛藤

亦名天燈籠。又名和尚頭草。白毛藤生人家牆壁上。莖葉皆有白毛。八九月開花藕合色。結子生青熟紅。烏雀喜食之。○百草鏡。白毛藤多生人家園圃中。牆壁上。春生冬槁。結子小如豆而軟。紅如珊瑚。霜

後葉枯。惟赤子纍纍。綴懸牆壁上。俗呼毛藤果。採其藤乾之浸酒。云可除骨節風溼痛。止血淋瘧疝氣。汁滴耳中。止膿不乾。入藥內。保腫毒不大。治癰疽。用煮牛肉精者食之。○清溼熱。治黃疸水腫。小兒蛔結腹痛。○採藥志云。性熱活血。追風生血。治鬼箭有效。

風痛。楊氏驗方。桑黃二兩。白毛藤二兩。切碎。用紹興原罈酒六斤。煎三炷香。每日服一飯盃。

黃疸初起。百草鏡。白毛藤。神仙對坐草。大茵陳。三白草。車前草。各等分。白酒煎服。

大氣脬。不藥良方。用白毛藤。無灰酒服。

天毬草

一名盒子草。俗呼盒兒藤。好生水岸道旁。苗高三四尺。葉如波斯。花有小絨。五月結實爲毬。毬内生黑子二片。生時青。老則黑。每片渾如龜背。又名龜兒草。丹術家取其汁伏硫汞。根伏雌雄。○百草鏡。鴛鴦木髓。一名水荔枝。盒兒藤。葉長尖。有鋸齒。生水涯。蔓生。秋時結實。狀如荔枝。色青。有刺。殼上中有斷紋。兩截相合。藏子二粒。色黑如木髓而小。孫氏丹方。盒子草。子及葉有小毒。蔓生岸旁。葉尖花白。子中有二片。如盒子。綱目。附於榼藤後。花實根形。俱不甚詳。

性有小毒。主蠱毒及蛇咬。搗敷瘡上即愈。

疔積初起。百草鏡云。鴛鴦木髓三錢。煎服愈。

敏按此草似預知子。近時人罕用。而吳氏遵程著從新。以預知子爲近日所無。直不知卽天毬草也。世不用。而草醫又易以他名。

松蘿

山川志出武當山。生高峯古木上。長者丈餘。

治蛇虎傷。湯火烙傷。及頑瘡等症。藥性考。松蘿甘平。能平肝氣。瞋怒痰熱。溫瘡吐痢。頭風頭瘡。癭瘤結聚。亦能探吐膈痰。去熱。

松上寄生

利水導痰。除胸中熱。

楓上寄生

汪連仕云。吊殺糊猴。一名上樹糊猴。又名鐵角猴兒。乃楓樹上風木藤。至年遠。結成連珠傀儡。能追風。不換時刻。酒蒸服。加金雀根土。當歸。石牀花根。石蠶。治癱瘓。勾急之要藥。

蛇莆藤

職方典。產福寧。莖細。葉如猴耳。

治喉齒百病。

李頭藤

職方典產福寧其藤腐朽者可代香用

止嘔血活經絡

龍鬚藤

粵東小錄藤產東莞微細如髮直起數丈無一節常飛越數樹如千百游絲牽綴紅者名紅龍鬚紫者名紫龍鬚有五色然生無根蒂以穢物投之即消釋不知所去土人以其液和細土石灰塗罽糖釜其堅如鐵雖猛火不裂其花與子皆入藥

浸酒服補筋骨祛風解毒能循脈絡無微不至

藥性考五色龍鬚藤細如髮生無根蒂挂樹長發

臭藤根

草寶云此草二月發苗蔓延地上不在樹間係草藤也葉對生與臭梧桐葉相似六七月開花粉紅色絕類牽牛花但口不甚放開搓其葉嗅之有臭氣未知正名何物人因其臭故名爲臭藤其根入藥本年者細小二三年者大如萊菔可用○李氏草祕云臭藤一名卻節對葉延蔓極臭煎洗腿足諸風寒溼痛拘攣不能轉舒如神○汪氏藥錄臭蒲萄蔓延而生子如蒲萄而臭治風又云野蒲萄氣重味臭

功能敗腸胃之癰。

治瘰癧。用根煎酒數服自愈。未破者消。已潰者斂。

治風痛腸癰。跌打損傷。流注風火痺毒。散鬱氣。洗疔。合紫蘇煎湯。汪遵仕方。

黃練芽

今呼黃連芽。一名黃穗頭。春初采嫩芽。小兒生食之。取其清香可口。味帶苦澇。如黃連。故名。亦可以鹽湯焯食。漉出曝乾爲鹽菜。暑月食之。○百草鏡。此物藤生。引蔓大樹上。葉如桑寄生。尖長柔滑。頗光潤。肥厚。二三月枯枝生芽。淡紅色。如椿芽。生食苦中帶甘。入口生津。安徽人家多醃以爲菜。與芹芽椿芽蘆芽並重。○藥性考云。葉似槐而尖。嫩時揉乾代茶勝茗。木甚細膩。苦中帶甘。味如橄欖。鹽食酸甜。解喉痛咽哽。消熱醒酒。舌爛口糜。嚼汁可解。

味苦澇。性寒。解暑。止渴。利便。食物宜忌。生津明目。清積熱。解毒。藥檢。

敏按。方以智物理小識。黃練頭一名回味。俗呼黃連頭樹。分葉如椿。大者合抱。春采其葉。味苦而甘。皮可合香入藥。治痢及霍亂。綱目遺此未收。如方氏所云。則木也。與百草鏡所云互異。或地土有不同耶。抑其物本有二種耶。並存俟考。

木龍藤

周益生家寶方。藤出錢塘橫山。喜沿人家牆壁及石崖上。土人多識之。

治肺癰吐。癰腸癰脇癰四症。擣汁。老酒沖服。冬月以酒搗取汁二盃服。立效。

萋油按萋即扶留藤。

萋即蒟也。嶺南人取其葉合檳榔食。今人名檳葉。用其葉封固。曬半載。收貯待用。可留數十年。非獨疏積滯消瘴癘。治病亦夥。惟西洋人有之。

治手足紅腫。或疼。以萋葉油揉擦。用布包裹。滴耳治耳痛。刀傷刺傷。以棉花浸萋油貼裹傷處。又治背癰及癩毒。貼之。初起者即解散。已成即速潰膿。亦可敷貼楊梅毒瘡漏痔。以上俱泰西應振鐸本草補。

花部

梅花梅梗。

綱目載梅花無治方。止言點湯煮粥助雅致而已。食物宜忌云。梅花味酸澆。性平。並無主治。殆亦不知梅花之用。入藥最廣。而功效亦最大。○百草鏡。梅花冬蕊春開。其花不畏霜雪。花後發葉。得先天氣最足。故能解先天胎毒。有紅白綠萼千葉單葉之分。惟單葉綠萼入藥尤良。採能不犯人手更佳。含苞者力勝。性寒。或曰平。味酸澆清香。開胃散鬱。煮粥食。助清陽之氣上升。蒸露點茶。止渴生津。解暑滌煩。○談撰。卉木皆感春氣而生。獨梅開以冬。蓋東方動以風。風生木。故曲直作酸。則酸者木之性。惟梅之味

最酸。乃得氣之正。北方水爲之母。以生之則易感。故梅先衆木而華。癸辛雜識。梅花無仰開者。蓋亦自能巧避風雪耳。驗之信然。粵志。惟嶺南梅花最早。冬至雷動地中。則梅開地上。蓋其時火之氣不足於地。而發其最初之精華。故梅開。水之氣上足於天。而施其最初之滋潤。故雪落。雪洩也。從肅殺之中。洩其一陽之精。以爲來春之生生者也。雪深則水氣足。梅早則火氣足。火氣足而爲天地陽生之始。陰殺之終。使萬物皆復其元。梅之德所以爲大。天地一陽之復。不可見。見之於梅。又其得氣之先也。韶州梅長至已花。臘月復開尤盛。有於舊蒂而作新花者。其地屬嶺北。故梅以臘以正月開。氣盛則開而又開。瓊州梅有六出者。予謂梅五出者也。五陽數也。冬至一陽始復。梅吐花得陽之先者。今六出乃得陰數矣。蓋以地氣而變。苦於嚴寒。故不用五而用六。同於雪花也。以梅爲體。以雪花爲用。人見其六而不見其五。藏五在於六之中。猶河圖之五在十中也。河圖之一生水。梅得水氣之先。故花於冬至與雪同時。雪者水氣所凝。梅者水形所結。卦皆屬坎。水在天而凝雪。水在地而發梅。水之數六。寒極則雪花與梅皆六出。應其數也。

花微酸。瀉無毒。清頭目。利肺氣。去痰壅滯。上熱。本草原始安神定魂。解先天痘毒。凡中一切毒。

治癩癧。雞蛋開一孔。入綠萼梅花將開者。七朵。封口。飯上蒸熟。去梅花。食蛋。每日一枚。七日全愈。
唇上生瘡。赤水玄珠。白梅瓣貼之。神效。如開裂出血者。卽止。

紫金錠。宜端午日製合。飛硃砂。紅芽大戟。處州山茨菇。千金霜。川文蛤。淨粉草。河車。以上六味各二兩。珍珠琥珀。明雄黃。冰片。陳金墨。各五錢。梅花蕊。西牛黃。各一兩。川麝香。四錢。右各藥爲末。乳篩極細。以糯米粉糊杵爲丸。研用。

稀痘神方。白梅花蕊三錢。採飽綻者。須預備曬乾。生地黄三錢。當歸三錢。生甘草一錢。臍帶小兒自己落下時。去灰或礬。用新瓦炙存性。研末極細。同煎濃汁。濾清熬膏。作一日喫完。小兒永不出痘。萬病回春。載尹蓬頭混元丹。治小兒諸虛百損。用梅花合混元衣。注梅花解痘先天之毒。

九仙奪命丹。集聽云。又名十聖丹。治七十二般無名腫毒惡瘡。流注火痹等症。硃砂三錢。雄黃乳香沒藥。冰片。血竭。各二錢。石膽礬。銅青。麝香。枯礬。熊膽。飛過黃丹。各一錢五分。蜈蚣。蚯蚓。蠶蠶。各二條。微炒黃色。去嘴。梅花一升。寒水石。牛黃。蟾酥。白官粉。礪砂。各一錢。全蠍。九個。蝸牛。七條。以上廿三味爲末。研極細。以硃砂一錢五分爲衣。其修合之法。先將蟾酥用乳汁化開。共爲丸。如丸不起。略加麵糊。如桐子大。每服一丸。令病人口嚼生葱一根咽下。又嚼一根極爛。吐在手心上。裹藥。用滾熱老酒吞下。量冷暖時候。蓋被出汗。如病人不能嚼。人代嚼之亦可。如無汗。再服一丸。白愈。凡諸毒醫遲。毒走攻心。必不可救。若汗來遲。以熱酒催之。不可以手摸摩患處。如癢。以舊木梳梳之。自止。

稀痘。集聽。用綠萼梅花七朵。須預養於花瓶內。春分日摘花半開者。只用淨瓣搗爛。白糖三匙。滾水

服之毒卽全消。免出痘矣。小兒滿月後卽可服。

梅花點舌丹。集驗治一切疔毒及惡瘡初起。天行瘟毒。咽喉腫痛等症。輕者二粒。重者四粒。先用無根水送下。次取一粒噙於舌下化之。乳香去油二兩。珍珠豆腐煮過。麝香水飛熊膽各六分。沒藥去油。京牛黃苦苧蔞硃砂礪砂蟾酥人乳泡血竭雄黃水飛各二錢。片腦一錢。另研沈香一錢。白梅花陰乾一錢二分。共爲細末。用人乳汁化蟾酥丸黍米大金箔爲衣。

預稀痘疹。不藥良方。每年臘月清晨摘帶露綠萼梅蕊一百。加上白糖。搗成小餅。令食之。

三花丹。赤水玄珠。將出痘之時。用此能稀痘。梅花桃花梨花取已開未開盛開者。陰乾爲末。等分。兔腦爲丸。雄黃爲衣。用赤小豆菘豆黑豆湯送下。

梅桃丹。赤水玄珠。治痘已出未出。不起不發。隱在皮膚。並治麻症斑症。用梅花一兩。桃仁辰砂甘草各二錢。絲瓜五錢。爲末。每服五分。參蘇湯下。

痘不問前後。凡黑陷咬牙寒戰。用梅花六錢。穿山甲一兩。仙露脾五分。麝香一錢。爲末。每服三五分。咬牙寒戰。加入牙二三釐。內托散送下。

青梅散。錫山衣德堂稀痘良方。用生青果核七個。打碎去仁。曬乾。研極細末。不宜火焙。又不宜沾生水。再用玉蝶梅花二十一朵。去蒂。共白蜜兩茶匙。搗濃。恰交春分時。與小兒服。永不出痘。卽出亦不過。

三粒。此方傳自江甯王培德家。已九世。無痘瘍之兒。真異方也。

二氣丸。新安汪偉公先生傳其家親友。凡小兒服此丸。永不出痘。其方卽前稀痘神方。臍帶曰坎氣。梅花先天之氣。故名二氣丸。

七仙丹。張琰種痘新書。治痘氣血兩虛。灰白水泡癢場等症。黃芪二兩。人參一兩。甘草五錢。紫河車一兩。梅花一兩五錢。鹿茸一兩。天靈蓋一個。共爲末。每服八九分。用內托散煎湯送下。氣實者加山查。陳皮各五錢。應昌按。天靈蓋卽或有益。亦不可用。况二方功效全不在此乎。

二花散。種痘新書云。能起五陷。黃蠟梅花素心者尤良。陰乾。不拘多少。去毛殼。罐盛聽用。桃花陰乾。山查去核。炒爲末。小絲瓜陰乾爲末。陳皮去白。人參。黃芪炙。甘草炙。硃砂。紫河車酒洗去筋。蒸焙乾。鹿茸酒酥炙。穿山甲取首尾四足者炒。仙靈脾去四弦刺酒焙。人牙火煨。韭汁焯七次。天靈蓋洗淨去酥。各爲末用。○按綱目梅花條下。並無主治。而於蠟梅花下亦僅言解暑生津而已。不知蠟梅亦並非梅種。其主治亦廣。不僅治痘也。

龍腦骨。種痘新書云。治痘出未透。心狂見鬼。陷伏等症。用梅花不拘多少。曬乾爲末。加冰片少許。共研爲末。以豬心血和勻爲丸。狂譫者燈心湯引。紫陷者以紫草煎湯調之。加酒數茶匙化下。絕痘。楊春涯驗方。用南方綠萼梅蕊未放。採藏風乾。逢四時八節。節前一日。用雞蛋一個。打孔入蕊。

紙糊好。飯上蒸熟。喫數次。永不出痘。卽出。亦不過數粒。

解痘毒。劉氏得效方。立春前後三日。採紅梅蕊半合。半開者一鍾。去蒂。仍安鍾內。磁碟蓋住。一週時。足氣汁升上。用新搗盆。未經五辛者。擣研如泥。捏成餅樣。加明硃砂水飛一錢。勻摻於上。緩緩研勻。再加白蜜少許。丸如彈子。曬半乾。金箔爲衣。遇四絕日。每服一九。甘草湯下。忌鐵器。葷腥。服過一九後。當日。晚間微微發熱。次日。遍身發出細癩。是其驗也。○種福堂方。梅花丸。治痘疹有起死回生之功。又換痘丹中。梅蕊犀角麻黃膏並用。

朱禹功仙傳稀痘方。赤豆黑豆菉豆各一兩。研末。入新竹筒中。削皮留節。鑿孔入藥。杉木塞緊。用蠟封固。臘月。浸廁中一月。取出風乾。每藥配梅花片三錢。每服一錢。以經霜絲瓜藤筋煎湯下。神效。

千里梅花丸。途中備用。醫學指南。用枇杷葉。乾葛末。百藥煎。烏梅肉。臘梅花。甘草。各等分爲末。用蠟化開。投蜜。每蠟一兩。加白蜜二錢。和藥末。搗二三百下。丸如雞頭實大。夏月。長途含化。一九。津液頓生。寒香滿腹。妙不可言。

梅梗

諸梅樹皆可用。以綠萼者佳。凡梅有氣條青翠色。此條無葉。止光梗出枝罅。薛徵君生白曾言。用以通上下膈氣有效。此氣條而非梗也。用梗以帶葉成枝者入藥。綱目梅部載梅實及核仁根葉。獨不及梗。

保產神效方。道聽集云。凡婦人三月久慣小產。百藥不效者。以梅梗三五條煎濃湯飲之。復飲龍眼湯。無有不保者。

雪荷花

雪裏花

產伊犁西北及金川等處大寒之地。積雪春夏不散。雪中有草類荷花。獨莖亭亭。雪間可愛。戊戌春。予於史太守處親見之。較荷花略細。其瓣薄而狹長。可三四寸。絕似筆頭。云浸酒則色微紅。彼處土人服之。爲助陽要藥。憶舊遊詩話。雪蓮花千年不化。元雪深處有之。形似蓮花。高可丈許。取以釀酒。倍增春色。蓋陰極而陽生之意耳。亦產巴里坤等處。西北域記。雪蓮產積雪中。一莖並蒂。浸酒色碧。性熱。人稱其功同仙茅枸杞。而不知其禍乃同砒鴆也。蝦蟆比蓮尤甚。予甥屠澗南自哈密回。帶有雪荷花。因訪其功效。據言其地有天山。冬夏積雪。雪中有蓮。以產天山峯頂者爲第一。然不可得。山腰次之。其生也有雌雄。土人採乾之。成對以市。性大熱。能補陰益陽。老人陽絕者。浸酒服。能令八十者皆有子。性大熱。治一切寒症。此物產於極冷之地。乃陰極陽生故也。朱排山柑園小識。雪蓮生西藏。藏中積雪不消。暮春初夏。生於雪中。狀如雞冠。花葉遍宵。花高尺許。雌雄相並而生。雌者花圓。雄者花尖。色深紅。性大熱。能除冷疾。助陽道。豪家爭致之。以治房中之藥。灤陽銷夏錄。塞外有雪蓮。生崇山積雪中。狀如今之洋菊。名以蓮耳。其生必雙。雄者差大。雌者小。然不並生。亦不同根。相去必一兩丈。見其一

再覓其一。無不得者。蓋如菟絲茯苓。一氣所化。氣相屬也。凡望見此花。默往探之。則獲。如指以相告。則縮入雪中。杳無痕迹。卽劓雪求之。亦不獲。草木有知。理不可解。土人曰。山神惜之。其或然歟。此生寒極之地。而性熱。二氣有偏勝。無偏絕。積陰外凝。而純陽內結。坎卦以一陽陷二陰之中。剝復二卦以一陽居五陰之上下。是其象也。然浸酒爲補劑。多血熱妄行。或用合媚藥。其禍尤烈。蓋天地陰陽均調。萬物乃生。人身之陰陽均調。百脈乃和。故素問曰。亢則害。承乃制。自丹溪立陽常有餘。陰常不足之說。醫家失其本旨。往往以苦寒伐生氣。張介賓輩矯枉過直。遂偏於補陽。而參耆桂附流弊。亦至於殺人。是未知易道扶陽。而乾之上九亦戒以亢。陽有悔也。嗜慾日盛。羸弱者多。溫補之劑。易見小效。堅信者遂衆。故余謂偏伐陽者。韓非刑名之學。偏補陽者。商鞅富強之術。初用皆有功。積重不返。其損傷根本則一也。雪蓮之功。不補患。亦此理矣。

治痘不起發。及悶瘡悶痘。止用一瓣。入煎藥中。立效。屢試皆驗。陳海曙云。

雪芝

南中紀聞。衡岳間有之。乃冰霰所結。歲久蒸積而成。產陰崖絕壁間。晶瑩如玉。懸挂峻坂。非攀蘿捫級。不可擷取。

療肺疾。降火清心。

雪裏花

朱楚良在鎮海。土人有采雪裏花者。冬月嚴寒。此花始生。在招寶山龍潭旁。環渚而發。苗甚短小。如六月雪狀。高不過二寸許。每雪時開白花如豆大。土人采得。乾之入藥。

敷痔漏。以雪裏花爲末。溼者乾摻。乾者麻油調搽。一二度。其痔卽消縮。

水仙花

能去風澤肌膚。潤毛髮。治五心煩熱。嘈雜不甯。同荷葉芍藥爲末服。

催生蘭

粵志。一名報喜蘭。風蘭之族。並非風蘭也。花如蠟梅而色紅紫。香味亦同。每莖作七八枝。懸樹間。勿侵地氣。遇有吉事則開。寤生者以花懸戶上卽生。○關涵嶺南隨筆。報喜遇吉事始開。種法以空爲根。以露爲命。與風蘭同。

主催生。

珠蘭

藥性考。珍珠蘭味辛。窻茶香郁。其根有毒。可磨敷癰癤。今名雞爪蘭。花經云。真珠蘭一名魚子蘭。枝葉似茉莉花。發長條細蕊。與建蘭同時。香亦相似。而濃郁過之。好情者取其蕊焙茶尤妙。但性毒。止可

取其香氣。故不入藥。張篁壬云。中條山有老道士。教人治狐魅。有一女子爲雄狐所祟。教以用珠蘭根。搗爛置牀頭。俟狐來交時。塗其莖物上。狐大嗥竄去。次日野外得一死狐。道士云。此根狐肉沾之卽死。性能毒狐。尤捷效也。

建蘭花

葉根草蘭。

建蘭有長葉短葉闊葉諸種。其花備五色。色黑者名墨蘭。不易得。乾之可治瞽目。能生瞳神。治青盲。最效。紅花者名紅蘭。氣臭濁。不入藥。黃花者名蜜蘭。可以止瀉。青色者惟堪點茶。或蜜浸。取其甘芳。通氣分。素心者名素心蘭。入藥最佳。蓋建蘭一莖數花。實蕙而非蘭也。綱目以薰草爲蕙。卽今零陵香。於蘭草下正誤條。申言蘭草可佩。乃孩兒菊。古名都梁香是也。且斥寇氏丹溪二家所解蘭草。混入世俗之蘭花爲非。而以蘭花爲幽蘭。與蘭草迥異。然何以不立幽蘭一條。不能無缺略之憾。因急補之。

素心建蘭花。乾之可催生。除宿氣。解鬱。蜜漬青蘭花。點茶飲。調和氣血。寬中醒酒。閩小記。建寧人家以蜜漬蘭花。冬月點茶。

芳香如初摘。

葉。丹溪云。建蘭葉稟金水之氣。而似有火。不知其能散久積陳鬱之氣。甚有力。今時醫用以通舒經絡。宜洩風邪亦佳。○本草匯云。蘭葉稟金水清芬之氣。似有火。獨走氣道。入西方以清辛金。不獨開胃清肺消痰。善能散積久陳鬱之結氣。今人但賞花香。不知用葉。亦缺典耳。況藥味載內經甚少。蘭獨擅

名。所謂治之以蘭。除陳氣也。故東垣方中每常用之。與藿香、枇杷葉、石斛、竹茹、橘紅、開胃氣之神品。入沈香、鬱金、白蔻、蘇子、蘆根汁。下氣開鬱。治噎膈之將成者。產閩中者力勝。江浙諸種力薄。辛平甘寒。陰中之陽。入手太陰。足陽明經。亦入足太陰厥陰經。生津止渴。開胃解鬱。潤肌肉。調月經。養營氣。本經主利水道。因其走氣道。故能利水消渴。除胸中痰癖。殺蠱毒不祥之氣者。蓋肺主氣。肺氣鬱結。則上竅閉而下竅不通。胃主納水穀。胃氣凝滯。則水穀不以時化。而爲痰癖蠱毒不祥之氣。辛平能散結滯。芬芳能除穢惡。則上症自除。本草

按綱目蘭草條不指幽蘭。而本草匯草部有蘭草。所言皆指建蘭。卽瀕湖所云幽蘭是也。今從其說補之。

根。名土續斷。治跌打和血。物理小識。幽蘭建蘭根甘。宜入藥。其花可茹。葉以浸油。黑髮。又云。都梁蘭根名土續斷。當是此也。○五雜俎。蘭根食之能殺人。忌內服。

治痰嗽後吐血。○劉羽儀經驗方云。先痰嗽後吐血而氣急者。用天冬、麥冬、生地、白芍、紫苑、山梔、桑皮、地骨皮等藥。如氣急去天冬。加真蘇子。取蘭花根搗汁沖服。尤妙。○江夏程雲鵬著慈幼筏。痘門載清地散花飲。凡痘見標三日。此方主之。有夾疹者。加蘭花根。額上灰滯色。加菊花、蘭花、梅花。或蘭花根亦可。又玉液春膏飲中。治背漿不足。加酒炒土蘭花。

草蘭

葉短而狹小。春花者名春蘭。秋花者名秋蘭。皆一幹一花。有一幹數花者。名九節蘭。其萼中無紅斑點。色純者名草素。尤香。入藥以一幹一花者良。

根。治瘋狗咬。行篋檢祕。取根四兩。水淨入黃酒二盃。煎成一盃服完。其毒卽從大小便化血而出。

玫瑰花

有紫白二種。紫者入血分。白者入氣分。莖有刺。葉如月季。而多鋸齒。高者三四尺。其花色紫。入藥用花瓣。勿見火。○百草鏡云。玫瑰花立夏前採。含苞未放者。陰乾用。忌見火。

氣香性溫。味甘微苦。入脾肝經。和血行血。理氣治風痹。○藥性考云。玫瑰性溫行血。破積損傷。瘀痛。浸酒飲益。

治吐血玫瑰膏。救生苦海。用玫瑰花一百朵。初開者去心蒂。河水二盃。煎半。再用河水一盃。煎半。去渣和勻。共有盃半。復煎至一盃。白糖一觔。收成調膏。不時服之。

噤口痢。用玫瑰花陰乾煎服。

治乳癰。玫瑰花七朵。母丁香七粒。無灰酒煎服。自愈。

腫毒初起。百草鏡。玫瑰花去心蒂。焙爲末。一錢。好酒和服。

乳癰初起。鬱症宜此。百草鏡。玫瑰花初開者。陰乾燥者。三十朵。去心蒂。陳酒煎。食後服。

肝胃氣痛。用玫瑰花陰乾。沖湯代茶服。

新久風痹。百草鏡。玫瑰花去淨蕊蒂。陰乾三錢。紅花全當歸各一錢。水煎。去渣。好酒和服。七劑。除根。永不再發。

吐紅。集聽。用玫瑰花。不拘多少。去蒂。搗汁。熬膏。貯瓶內。每早空心茶匙挑四五匙。白滾水沖服。一二日即愈。

少林拳經。玫瑰花能治跌打損傷。

風痹藥酒。救生苦海。用白槿花大紅月季花玫瑰花去蒂各一兩。鬧羊花五錢。風茄花五朵。龍眼肉北棗肉各一兩。紹酒五壺。浸封七日。隔水煮之。罈上置白米一撮。米熟成飯爲度。取出。每服二三杯。蓋暖臥。避風。即愈。

保真丸。朱排山柑園小識。保真丸。能通經絡。和百脈。壯腰腎。健脾胃。加飲食。健步履。除一切痼疾。能固真元。用玫瑰花去蒂摘瓣。以竹紙糊袋裝之。薄攤曬乾。取淨末一觔。不宜見火。此花色能益血。香能補氣。妙難盡述。補骨脂一觔。淘淨泥土。用芩朮荅甘各五錢。煎汁一盃。拌曬。以汁盡曬燥炒。兔絲子一觔。用芎歸芍生地各五錢。煎汁去渣。以汁煮兔絲子。俟吐絲爲度。曬乾炒。胡桃仁六兩。連皮搗如泥。杜仲四兩。鹽水炒去絲。韭子四兩。淘淨微火炒。各爲細末。煉蜜爲丸。如桐子大。每晨空心白湯服四錢。忌

羊肉羹薑並諸血。一方加魚膠四兩。男婦共服。可以種子。極效。或加鹿角膠枸杞子。

金雀花

一名黃雀花。似六月雪而本高。正二月開花。色黃。根有刺。根入藥。○花鏡。金雀花枝柯似迎春。葉如槐而有小刺。仲春開黃花。其形尖。旁開兩瓣。勢如飛雀。可愛。其花鹽湯焯過。控乾入茶供。○百草鏡。金雀花生山土中。雨水時開花。色黃而香。形酷似雀。白花者名銀雀。最難得。其莖有白點。花後發葉碎小。葉下有軟刺。取根入藥。去外黑皮及內骨用。別有霞雀花。更不可得。○嘉興府志。金雀一名飛來鳳。鹽浸可以點茶。○成化四明志。金雀兒花產奉化。○丁未。余館奉化。劉明府署。時明府幼孫患痘不起。發醫用金雀花。詢其故云。此藥大能透發痘瘡。以其得先春之氣。故能解毒攻邪。用花性平和。血祛風。入肝脾二經。亦入乳癰用。百草鏡。跌撲傷損。以金雀花乾者研一錢。酒下。根。治跌打損傷。又治咳嗽。煖筋骨。療痛風。性能追風活血。兼通血脈。消結毒。○濟世良方。金雀根搗汁和酒服。渣罨傷處。治跌打損傷。

金蓮花

廣羣芳譜。出山西五臺山。塞外尤多。花色金黃。七瓣兩層。花心亦黃色。碎蕊。平正有尖。小長狹。黃瓣環繞其心。一莖數朶。若蓮而小。六月盛開。一望徧地。金色爛然。至秋花乾不落。結子如粟米而黑。其葉綠。

色瘦尖而長。五尖或七尖。○五臺山志。山有旱金蓮。如真金。挺生陸地。相傳是文殊聖蹟。○張壽莊云。五臺山出金蓮花。寺僧採摘乾之。作禮物餉客。或入寺獻茶。蓋中輒浮一二朵。如南人之茶菊然。云食之益人。查慎行人海記。旱金蓮花。五臺山出。瓣如池蓮較小。色如真金。曝乾可致遠。有分餉者。以點茶一甌置一朵。花開沸湯中。新鮮可愛。後扈從出古北口外。塞山多有之。開花在五六月間。一入秋。莖株俱萎矣。○金蓮花出五臺山。又名旱地蓮。一名金芙蓉。色深黃。味滑苦無毒。性寒。治口瘡喉腫。浮熱牙宣。耳疼目痛。煎此代茗。

明目。解嵐瘴。軒。恕。疔瘡。大毒諸風。山海草函。

佛桑花

粵語佛桑枝葉類桑。花丹色。名朱槿。一名福桑。又名扶桑。重臺者曰愛老。多以爲蔬。綱目木槿後有扶桑條。止載外治。故補之。

吳震方嶺南雜記。扶桑粵中處處有之。葉似桑而略小。有大紅淺紅黃三色。大者開泛如芍藥。朝開暮落。落已復開。自三月至十月不絕。佛桑與扶桑正相似。而中心起樓。多一層花瓣。今人以扶桑佛桑混一。非也。紗緞黑退變黃。搗扶桑花汁塗之。復黑如新。

潤容補血。粵。美顏潤血。陳述齋鎖語。朱槿花蒸醋食之。粵中婦女多以此美姿。敏按。兩粵瑣語。載朱槿與佛桑皮微有異。云朱槿

一名日及。亦曰舜英。葉如桑。光潤而厚。高止四五尺。而枝婆娑。自仲春花至仲冬。一叢之上。日開數百朵。朝開暮落。色深紅。五出。大如蜀葵。瓣捲起。勢若飛颺。層出如樓子。有蕊一條。比瓣稍長。上綴金屑。日光所燦。疑有火焰。粵女多種之。插枝卽生。蘇子瞻詩。焰焰燒空紅佛桑。謂朱槿也。然佛桑又有殷紅水紅黃紫各色。比朱槿差小。稱小牡丹。四時有花。白者以爲蔬菜。甜美可口。女子食之尤宜。據陳述齋所云。則佛桑與朱槿一類而二物。要其功用亦不甚遠。故粵語以爲卽朱槿。今並附錄其功用。以補李氏所未備。

寶珠山茶

雲溪方以落地花仰者爲貴。山茶多種。以千葉大紅者爲勝。入藥。○百草鏡。山茶多種。惟寶珠入藥。其花大紅四瓣。大瓣之中。又生碎瓣極多。味濇。二三月採。陰乾用之。若俱是大瓣。千葉者名洋茶。不入藥。單瓣者亦不入藥。羣芳譜。寶珠山茶可代鬱金。研末麻油調。塗湯火灼傷。

味微辛甘。性寒。破血消癰。跌打吐血。症用之。又治腸風瀉血。湯火傷。鼻衄。灸瘡。均焙研七朶。空心酒服。

○百草鏡云。涼血破血。止血。瀉劑也。消癰腫。跌撲。斷久痢。腸風下血。崩帶血淋。鼻衄吐血。外敷灸瘡。

赤痢。救生苦海。用大紅寶珠山茶花陰乾爲末。加白糖拌勻。飯鍋上蒸三四次服。

鼻中出血。何明遠方。千葉大紅山茶花。二三月採。陰乾。用時取五六朶。煎服卽止。又張氏必效方。

鼻衄。用寶珠山茶。大紅者。焙研三五錢。砂糖滾水和服。

吐血咳嗽。不藥良方。寶珠山茶。瓦焙黑色。調紅砂糖日服。不拘多少。

又方。寶珠山茶十朵。紅花五

錢。白芨一兩。紅棗四兩。水煎一盃服之。渣再服。紅棗不拘時。亦取食之。

蔣儀藥鏡拾遺賦。山茶花。吐血衄血腸風下血之良將。

宋春暉云。曾見有人患乳頭開花欲墜。疼痛異常。有教以用寶珠山茶焙研爲末。用麻油調搽立愈。

痔瘡出血。汪子明方。用寶珠山茶研末沖服。

粉團花附根

有大小二種。其花千瓣成簇。大者曰玉粉團。初青後白。小者曰洋粉團。青色轉白。白後轉紅藍色。入藥

用大者。

性寒。熏臭蟲。同水龍骨雷公藤和燒熏之。立除。百草鏡

洗腎囊風。姚伯玉方。用粉團花七朵。水煎洗。○良方集要。用蛇牀子牆上野苧瑋球花。煎湯洗之。

根。治喉爛。傳效方。取入土內者好。醋磨以翎毛蘸掃患處。涎出愈。

玉簪花

綱目玉簪條。載根葉之用。獨不言其花。今人取其含蕊實鉛粉其中。飯鍋上蒸過。云能去鉛氣。且香透

粉內婦女以勻面無黥痣之患。其葉乾之熏壁蟲絕跡。

花性微毒。治小便不通。彙集方玉龍散中用之。

治癬第一靈丹。寶誌遺方。鮮玉簪花三百朵。爲泥。母丁香六兩。沈香四兩。冰片三錢。麝三錢。山西城磚十二兩。共爲末。用真麻油三觔半。熬熟。陳年石灰半觔。滴水成珠爲度。候冷。收瓷罐內。黃蠟封固。埋土內。二十一日取出。敷患處自愈。此藥可久貯。勿使洩氣。

治杖破。玉簪花手排熟貼傷處。

清涼膏。張卿子祕方。貼疔瘋毒。大黃。黃柏。黃連。黃芩。鬱金。皮消。白芨。獨腳蓮。天花粉。玉簪花。共研細末。雞子清調敷。留頂。又二香。追毒飲。治肚心癰。羌活。連翹。紫蘇。甘草。白芷。防風。銀花。天花粉。肉桂。黃芪。乳香。木香。沈香。芍藥。生地。枳殼。黃芩。柴胡。前胡。茯苓。玉簪花。水煎。食後服。

山海草函。玉簪花入韶粉內。敷疔瘡。蛀梗。

玉龍散。治小便不通。用玉簪花。蛇蛻各二錢。丁香一錢。共爲末。每服一錢。酒調送下。醫學指南

玉蘭花

瀕湖綱目。辛夷集解下。惟云有花白者。人呼爲玉蘭。並不另立主治。卽辛夷亦用苞蕊。不及其花之用也。今采龍柏藥性考補之。

性溫香滑消痰益肺和氣蜜漬尤良。

痛經不孕。良方集要。玉蘭花將開未足。每歲一朵。每日清晨空心水煎服。

丁香花

未詳形狀。藥性考。

味辛微溫。窸茶弔露。清利頭目。

紫茉莉

此草二三月發苗莖。逢節則粗如骨節狀。葉長尖光綠。前銳後大。小暑後開花。有紫白黃三色。又有一本五色者。花朝開暮合。結實外有苞。內含青子成簇。大如豌豆。久則黑子。內有白粉。宿根三年不取。大如牛蒡。味微甘。類山藥。陳扶搖花鏡。紫茉莉一名狀元紅。本不甚高。但婆婆而蔓衍易生。葉似蔓菁。○按紫茉莉入夏開花。至深秋未已。白花者香尤酷烈。其花見日即斂。日入後復開。亦不經久。一日即萎。西人有食之者。去其外皮。鹽漬以佐饌。云能去風活血。無濁淋等症。然其性秉純陰。柔中帶利。久食恐骨軟。陽虛人尤忌之。性惡鐵。凡取用忌鐵器。

根治乳癰白濁。花可浸酒。子名土山奈。取其粉。可去面上斑痣粉刺。性寒。藥性考

野薔薇

百草鏡山野與家種無異。但形不大。花皆粉紅色。單瓣。無千葉者。春月山人採其花。售與粉店。蒸粉貨。售爲婦女面藥。云其香可辟汗。去黧黑。○花鏡野薔薇一名雪客。葉細而花小。其本多刺。蔓生籬落間。花有純紅粉紅二色。皆單瓣不甚可觀。但香最甜。似玫瑰。人多取蒸作露。採含蕊拌茶亦佳。患瘡者烹飲卽愈。六研齋筆記。通元子服餌法。春時服薔薇嫩頭。一月卽可。每日服信三釐。漸增至一分。卽可入水。坐臥不病。如是經年。卽可蠟塗身體。挾利刃潛遊江湖。劫睡龍之珠。得珠而行空自如。觸石無礙。三界八寶可縱浪矣。此飛仙之業也。而始於嚙薔薇頭。談此於客。未有不胡盧而笑。

花治瘡。○伍涵芬讀書志。白野薔薇花。拌茶煎服。可驅瘡鬼。○婦人鬱結吐血。○劉克中云。香烈大耗真氣。虛人忌服之。

根治肺癰。吐膿痰。酒煎服。口瘡煎湯漱口。○子名石珊瑚。治產後軟癱。○婦人禿髮。用薔薇嫩枝。同猴薑煎汁刷之。

秋海棠

嶺南隨筆。海棠本無香。惟清遠歸猿洞秋海棠。肇慶瓊羊峽春海棠。其香特盛。○羣芳譜。一名八月春。草本。花色粉紅。甚嬌豔。葉綠如翠羽。此花有二種。葉下紅筋者爲常品。綠筋者開花更有雅趣。○大觀錄。秋海棠亦名斷腸草。其根莖有毒。犬馬食之卽死。浸花水飲之害人。○漳州府志。秋海棠歲每生苗。

其莖甚脆。葉背作紅亂紋。云是相思血也。相傳昔人有以思而噴血階下。遂生此。故亦名相思草。其花一朵謝。則旁生二朵。二生四。四生八。具太極象。雅豔異常。○花鏡。秋海棠一名八月春。爲秋色中第一。本矮而葉大。背多紅絲如胭脂。作界紋。花四出。以漸而開。至末朵結鈴子。生極枝。花嬌冶柔媚。其異種有黃白二色。一名斷腸花。○周開鄂云。秋海棠俗傳其花中黃心。有大毒。人食多死。予一日悞食此。驚惶一夜。倉卒旅邸。無藥可解。但委命聽之而已。次日亦無恙。丁憲榮云。秋海棠葉初生山左。小兒爭采食之。味微酸生津。能益唇色。如塗朱然。則其無毒可知。○藥性考。海棠喜背陰而生。故性寒。凡大熱症可用。

味酸。性寒無毒。和蜜搽面。澤肌潤肉。其幹搗汁治咽喉痛。藥性考百草鏡云。擦癬殺蟲。用葉花浸蜜。入婦人面藥用。○物理小識。白銀以烏梅三葉酸。秋海棠葉皆可。

海棠蜜。救生苦海。紅秋海棠採花去心。白蜜拌勻。蒸曬十次。令化爲度。冬月早晨洗面後敷之。能令色豔。并治吹花癬疥瘡。○慈航活人書。有製海棠蜜法。上白蜜一大杯。紅秋海棠現取花片。用拌入蜜內。將花略搗爛。日日曬。或蒸數次。白爛如泥。其蜜色如海棠。或加入好芙蓉粉少許。光絕可愛。且免面皮凍裂。

茶菊城頭菊。金鈴菊。金
菊。菊米。菊根。

茶菊較家菊朵小多心有黃白二色杭州錢塘所屬良渚檜葬地方鄉人多種菊爲業秋十月采取花
挑入城市以售黃色者有高腳黃等名色紫蒂者名紫蒂盤桓白色千葉名千葉玉玲瓏徽人茶舖多
買焙乾作點茶用常中丞安宦遊筆記鳳凰山產菊花不甚大蒂紫味甘取以點茶絕佳又浙省城頭
一帶產菊名城頭菊皆生城上石縫中至秋開花花小於茶菊香氣沁腹點茶更佳此則茶菊之野生
者味性不同臨安山中所產一種野菊名金鈴菊花小如豆與城頭菊彷彿山人多采入藥舖作野菊
花用實與野菊又不同野菊食之瀉人而鈴菊又不作瀉野菊瓣疎此則旁瓣密爲別也瀕湖綱目菊
分家野而此數種獨未言及今杭俗以茶菊作餉遺客爲用最廣予故不惜覲縷言之兼補瀕湖所未
備焉○百草鏡云甘菊卽茶菊出浙江江西者佳形細小而香產於亳州者不可用白而微臭近日杭
州笕橋安徽池州紹興新昌唐公市湖北映州皆產入藥用陰乾者去蒂以白朮枸杞子地骨皮爲使
反河魴及無鱗魚園菊花大不入藥止可裝枕去風其根治疔腫卻效○羣芳譜一名真菊一名家菊
一名茶菊花正黃小如指頂外尖瓣內細萼柄細而長味甘而辛氣香而烈葉似小金鈴而尖更多亞
淺氣味似薄荷枝幹嫩則青老則紫實如葶藶而細種之亦生苗人家種以供蔬茹凡菊葉皆深綠而
厚味極苦或有毛惟此葉淡綠柔莖味微甘咀嚼香味俱勝攝以作羹及泛茶極有風致○萬歷嘉善
縣志花黃梗紫爲甘菊最良野菊叢生花小性涼家菊花大氣弗聚矣○黃茶菊以紫蒂爲佳明目去

風。搜肝氣。治頭暈目眩。益血潤容。入血分。○食物宜忌。黃菊花卽甘菊花。苦微甘。性平。益肺腎。去風除熱。補血養目。清眩運頭風。○白茶菊。千葉者佳。通肺氣。止欬逆。清三焦鬱火。療肌熱。入氣分。其根治疔腫喉疔喉癰。○海甯出茶菊。名金井玉欄杆。其花心黃邊白。點茶絕佳。○聖惠方云。黃甘菊雖能燥溼祛風。亦能助火泄氣。

性平。專入陽分。治諸風頭眩。解酒毒疔腫。

撲打損傷。○王阮亭居易錄云。四川提督吳英說。昔得撲打損傷祕方。雖重傷瀕死。但一絲未絕。灌下立甦。其方以十一月采野菊花。連枝葉陰乾。用時取一兩。加童便無灰酒各一盃。同煎熱服。

紅絲疔。立效驗方。以白菊花葉無白者。別菊亦可。冬月無葉取根。加雄黃錢許。蚯蚓二條。共搗極爛。從頭敷至絲盡處爲止。用絹條裹緊。隔夜卽清。真神方也。

城頭菊

朱排山柑園小識。杭城石罅生菊。枝葉極瘦小。九月開花如豆。香而且甘。雍正初。禁人採取。以充貢品。宮闈以作枕。城上之菊。旣爲野生而味甘。亦一異也。蘇頌圖經云。有一種開小小花瓣。下如珠子。謂之珠子菊。豈卽此歟。

明目。去頭風喉痹。癰毒涼血。其枝葉鮮者。生搗罨疔瘡。并服其汁。兼治蛇咬瘰癧。梅瘡眼癩。煎洗天泡。

瘡亦效。

金鈴菊

百草鏡云。采花乾之作枕。除頭風目疾內熱。洗風火眼。止熱瀉。搗罨一切腫毒。諸蟲咬螫。有效。胃虛便滑。無實熱者忌用。以其苦寒傷胃能作瀉也。○羣芳譜載金鈴菊。花小如鈴。其幹長與人等。凡菊葉皆五出。此葉獨尖長七出。花與葉層層相間。不獨生於枝頭。此乃家種金鈴菊。非野生金鈴菊也。然功用要亦彷彿。

金箭頭

馬伯州菊譜。花長而末銳。枝葉可茹。名金箭頭。又名風藥菊。專治頭風。較他菊十倍。

菊米

處州出一種山中野菊。土人采其蕊乾之。如半粒菉豆大。甚香而輕圓黃亮。云敗毒散疔。去風清火。明目爲第一。產遂昌縣石練山。

菊根

張介賓本草正云。白菊根善利水。搗汁和酒服之。大治癰閉。

瘰癧未破。醫學指南探野菊根搗爛。煎酒服。渣塗上自消。不消自破。

睡蓮

廣志睡蓮布葉數重。葉如荇而大。花有五色。當夏晝開。夜縮入水底。晝復出。與夢草晝入地夜即復出。相反。廣州有之。諺曰。毋佩睡蓮。使人好眠。綱目蔬部載睡菜。而睡蓮獨遺。故補之。○張黻大觀錄。綽菜。夏月生於池沼之間。葉類茨菰。根如藕條。食之令人思睡。又名眠菜。○嶺南雜記。睡蓮菜一名瑞蓮花。瓣外紫內白。榦如斂股。心似雞頭。以水淺深為短長。日沈夜浮。必雞鳴采之始得出。高州。

佩之多好眠。廣志清香爽脆。消暑解醒。嶺南雜記

瑞香花

粵語乳源多白瑞香。冬月盛開如雪。名雪花。刈以為薪。雜山蘭芎藭之屬燒之。比屋皆香。其種以攀枝為上。有紫色者香尤烈。雜衆花中。花衆往往無香。皆為所奪。一名奪香花。乾者入藥用。綱目芳草內瑞香條。止載其根。治急喉風。用白花者。研水灌之。亦不言其花之功用。故補之。

稀痘。治乳岩初起。

藥性考。瑞香花。馥糖餞芳甘。清利頭目。齒痛宜含。

子午蓮

綱目水草部。入蘋。以為此。即大葉之蘋也。古人以為食品。祭用蘋蘩。即此。今浙人呼為子午蓮。生水澤。

敗蕩中葉較荷而小。缺口不圓。入夏開白花。午開子斂。子開午斂。故名。采花入藥。治小兒急慢驚風。煎湯服用。七朵或十四朵。杭城張子元扇店。施此救人多年矣。

桃金娘

粵志。草花之以孃名者。有桃金娘。叢生野間。似梅而未微銳。似桃而色倍赭。中莖純紫。絲綴深黃。如金粟。名桃金娘。八九月實熟青紺。若牛乳狀。產桂林。今廣州亦多有之。粵歌云。攜手南山陽。采花香滿筐。妾愛留求子。郎愛桃金娘。○花鏡。金絲桃一名桃金娘。出桂林郡。花似桃而大。其色更赭。中莖純紫。心吐黃鬚。鋪散花外。儼似金絲。八九月實熟青紺。若牛乳狀。味甘。可入藥用。如分種。當從根下劈開。仍以土覆之。至來年移植便活。

花。行血。

子。味甘入脾。養血明目。

假素馨

出廣中。青藤仔花也。○粵語。青藤仔葉長三四寸。多芒刺。莖大如指而堅韌。人家日用之。猶北地之用柳條。

煎湯洗瘡疥良。

千金花

此卽千金草花。千金草卽本經蘭草。今所呼孩兒菊省頭草是也。二月宿根再發。紫莖素枝。赤節綠葉。對節生。光澤有歧。嫩時可掇。可佩。八九月漸老。枝頭成穗。作花紅白狀。似雞蘇。久之花瓣轉白。絨裂如毳。毳中有子一粒。絨著子上。色黑味苦。臭香氣裂。卽千金花也。瀕湖綱目僅載其葉之用。本草乘雅云。以千金花煮酒。臭類木香。苦甚黃連。用治滯痢。獲效頗捷。予故采其說入花部。以補所未備。花氣香味苦。浸酒治滯下。以其能闢不祥。利水道。宣氣四達之功耳。乘雅

梧桐花

山海草函。治杖丹癩頭湯火傷。

金鳳毛

汪連仕云。今人呼翠翎草。翠透如翎。細葉塌地而生。與翠雲草鳳尾不同。敏按。此種卽蔦蘿。今人編竹爲亭臺。植之盆中。秋開大紅小花者。是也。

治耳疔痔漏。

十姊妹

一名佛見笑。汪連仕云。取其根葉陰乾爲末。蜜糖湯調服。治傷寒危篤立效。乃元升觀之祕方。

兩韭

汪連仕草藥方云。兩韭生水澤旁。卽青茨菇花。去溼之功同茵陳。散一切疔腫。消痔漏明目。

罌粟子油

固精。物理小識。

佛前舊供花

雲谷醫抄。治臙瘡爛腿。用佛前多年陳久供花。取來用香油浸貼。卽愈。

果部上

延壽果

乃鹿銜草之子。又松潘衛志有延壽果。云果生於土。味甜似山藥。並無樹果。此或名同而物異也。○按鹿銜。千金方名鹿藥草。其葉大而面綠背青者爲眞。蘇恭言有大小二種。保昇言葉似芫蕪。叢生有毛者。吳風草也。此草惟生於秦地者有子。土人名曰延壽果。

仁恕堂筆記。張掖河西地有草根。一種形如黃連。盤根屈曲。有若缺然。邊人取之。實籩豆用之。供餽遺。名曰延壽果。俗又稱鹿跑草。其味甚甜。

理血中邪溼。溫補下元。去風痺癱瘓痛。小兒食之。定驚悸。三邊紀略。本草逢原云。味微瀉而甘。不特有益老人。而嬰兒先天不足者。尤爲上藥。惜乎南方罕得也。

櫻額

果屬也。產關東烏喇口外。其樹叢生。果形如野黑葡萄而稍小。鮮實甚美。曬乾爲末。可以致遠。○盛京志。一名稠梨子。實黑而澀。土人珍之。閒以作麪。暑月調水服之。可止瀉。

按宦遊筆記。郁李卽棠棣。結子如櫻桃。南產者酸澀不堪食。盛京出者又名櫻額。味甘鮮。曬乾爲末。更佳。

味甘澀。性溫煖。補脾。止洩瀉。

倒弔果

御製幾暇格物編。俗名弔搭果。形似山梨而小。體微長。味酢。肉多沙。長蒂。諸果始生時皆向上。此果花實皆下垂。故名。生時堅澀。熟乃沙。樹枝葉俱如梨。爲秦中物產。今遵化沿邊有之。而考之書籍草木諸譜。皆不載倒弔之名。惟上林賦云。答選離支。答選音近打拉。張揖注云。答選果名。按梅堯臣牡丹詩。用打拉二字。北人方言以欹垂爲打拉。是答選名果。或因其下垂也。說文海篇俱作搭。櫻果。今名弔搭。或是答選音之轉耳。

性暖。利胸膈。健脾消食。

飛松子

雲南土司志。邊境各土司深山中。產一種飛松子。結實熟時。人欲取之。子輒飛去。夜則仍歸根下。土人記其處。俟夜過子。掘其根而取之。饋遺以爲珍品。味絕香美。○徐霞客遊記。飛松一名狐實。亦作梧桐實。正如梧桐子。而大倍之。色味亦如梧桐子。而殼薄易剝。坐密樹中。一見輒伐樹。乃可得。遲則樹卽存。而子俱飛去。成空株矣。故曰飛松。惟巔堂關外野人境有之。其葉如柳。味絕類土豆。○滇略。梧桐實大如豆。殼脆易剝。不與他處類。俗謂之山松子。亦曰飛松。○朱排山柑園小識。飛松出滇南。似梧桐子稍大而微長。內外色味俱肖。而香美過之。蔓生松樹上。土人甚珍之。

下氣消痰。通和血脈。能返魂。凡有人魂神不安。及驚越失魂。神不守舍。一切等症。此爲要藥。故靈璧趙氏天王補心丹。治怔忡用之。張菴猗言。十香返魂丹。加飛松子殼。更效。

茶朥子

邊輿考。其樹出遼東塞外。高有三尺許。葉如南方棟樹。背有黃白點。花四出。形如手。碧色。或有八出者。結子大如拳。熟便可食。其甘如飴。其樹浸水。可爲油燃燈。入藥用子。治一切病。遼塞無藥。土人有病者。取茶朥子啖之。卽愈。

椰油椰中酒椰膏
椰皮椰肉

臺灣使槎錄云。可佐膏火。或云用火炙椰。其油自出。凡揀椰子。以手搖之。聽水聲清亮。則心大而甜。其肉厚。水聲濁則否。○澠水燕談錄。椰子生安南及海外諸國。木如櫻欄。大者高百餘尺。花白如千葉芙蓉。一本花不過三五顆。其大如斗。至差小。外有黃毛。軟皮。中有殼。正類檳榔。殼上有二穴。牙出穴中。殼內類蘿菔。皮味苦。肉極甘脆。蠻人甚珍之。○劉恂嶺表錄異。椰殼中有液。數合如乳。亦可飲之。冷而動氣。○廣果錄。椰樹高六七丈。直竦無枝。至木末。乃有葉如束蒲。長二三尺。花如千葉芙蓉。白色。終歲不絕。葉間生實如瓠繫。房房連累。一房二十七八實。或三十實。大者如斗。有皮厚苞之。曰椰衣。皮中有核甚堅。與膚肉皆緊著。皮厚可半寸。白如雪。味脆而甘。膚中空虛。又有清漿升許。味美於蜜。微有酒氣。曰椰酒。蘇軾詩。美酒生林不待儀。言椰中有自然之酒。不待儀狄而作也。○廣東名勝志。文昌縣玉陽山椰子最多。大三四圍。高二三丈。通身無枝。至百餘年。纔有葉。三月花。連著實房。房三十或二十七八子。至六月熟。七月收。

療齒疾凍瘡。粵志祛暑氣。華夷花木考治消渴。塗髭髮。立黑。澠水燕談錄

椰中酒。食物考。緬甸有樹頭酒。卽椰子中漿汁也。華夷花木考。載林邑王與南越王有怨。遣刺客匕其首。梟之樹上。化爲椰子樹。當刺時。王方大醉。故椰漿如酒。飲之醉人。

祛風消水腫。止吐血。塗頭黑髮。然多食昏人。動氣增渴。性溫故也。久服可烏鬚。食物

椰膏。粵載椰子殼。土人取以熬膏。色黑如漆。塗癖良。

椰皮。煮汁止血。療吐逆。瀉水燕 談錄

椰肉。益氣生風。瀉水燕 談錄

楊梅下疳。筋骨疼痛。不藥良方。椰子殼燒存性。臨燒以滾酒泡服二三錢。暖臥取汗。其痛即止。

宜母果

嶺南雜記似橘而酸。又名宜濛子。○元吳萊有宜濛熱水歌。○粵語宜男子似橙而小。二三月熟。黃色。味極酸。孕婦肝虛嗜之。故曰宜母。元時於廣州荔支灣作御果園。栽種里木樹。大小八百株。以作渴水里木。即宜母子也。一名黎濛子。吳萊詩。廣州園官進渴水。天風夏熱宜濛子。百花醞作甘露漿。南園烹成赤龍髓。蓋以里木子榨水煎糖也。蒙古以為舍里別。即渴水也。一名藥果。當熟時人家競買。以多藏而經歲久為尚。汁可代醋。染大紅。以其汁調乃上。○藥性考。黎濛子大如梅。形似橘。孕婦宜食。能辟暑。即宜濛子。孕婦食之能安胎。故又名宜母。

醃食。下氣和胃。懷孕不安。食之良。製為漿。辟酷暑。又能解渴。○宜母子以鹽醃。歲久色黑。可治傷寒痰

火。脾。

天師栗即娑羅子

一名娑羅子。治胃痛最驗。綱目於主治下失載。○通雅。娑羅。外國之交讓木也。葉似柎。皮似玉蘭。色蔥白。最潔。烏不棲。蟲不生。子能下氣。○益部方物記。生峨嵋山中。類枇杷。數葩合房。春開。葉在表。花在中。或言根不可徙。○吳船錄。木葉如海桐。又似楊梅。花紅白色。春夏開。長安客話。臥佛寺內娑羅樹二株。子如橡栗。可療心疾。○宸垣識略。娑羅花苞大如拳。葉如枇杷。凡二十餘葉相沓。捧苞類桐花。一簇三十餘朵。經月方謝。○留青日札。娑羅樹出西番海中。予在潯州時。官圃一株甚巨。每枝生葉七片。有花穗甚長。而黃如栗花。秋後結實如栗。可食。正所謂七葉樹也。藥性考。娑羅子一枝七葉九葉。苞如人面。花似牡丹。香白。

肉味苦微涼。寬中下氣。治胃脘肝膈膨脹。疝積瘡痢。吐血勞傷。平胃通絡。用陰陽瓦炙灰。或酒煨食俱效。單用不入他藥。或稱天師栗。非也。○葛祖遺方。味甘溫無毒。治心胃寒痛。蟲痛。性溫殺蟲。胃痛。○百草鏡。用莎婆子。即娑羅子也。以一枚去殼。搗碎煎服。能令蟲從大便出。三服除根。九種心痛。楊春涯驗方。娑羅子。即武吉。燒灰沖酒服。

化州橘紅橘類上絲。糖橘紅。橘餅。藥。
製柑橘餅。青鹽陳皮。橘荅。

嶺南雜記。化州仙橘。相傳仙人羅辨種橘於石龍之腹。至今猶存。惟此一株。在蘇澤堂者為最。清風樓

次之。紅樹又次之。其實非橘。皮厚肉酸。不中食。其皮釐爲五片七片。不可成雙。每片真者可值一金。每年所結。循例具文報明上臺。屆期督撫差親隨。跟同採摘批製。官斯土者。亦不多得。彼土人云。凡近州。始聞譙樓更鼓者。其皮亦佳。故化皮賈者多。真者甚難得。○關涵嶺南隨筆。化州署橘樹。一月生一子。以其皮入藥。痰立解。後爲風折。卽其地補種。氣味便殊。今稱化州橘紅者。皆以增城香柚皮僞代之。能化物而不能自化。○粵語。化州有橘一株。在署中。月生一子。以其皮爲橘紅。淪湯飲之。痰立消。龔亦進御。今爲大風所拔。新種一株。味不及。化州故多橘紅。售於嶺內。而產署中者獨異。○本草乘雅云。橘柚專精者實。實復專精者皮。皮布細竅。宛如人膚。卽脈絡肉理筋膜子核。各有屬焉。故力能轉入爲升。轉升爲合。卽轉合爲開也。種種形證。悉從入從合。故胸中瘕熱。水穀失宣。神明不通。氣逆及氣臭耳下氣者。出巴而降。玉衡機轉之妙用也。○識藥辨微云。化橘紅近日廣中來者。皆單片成束。作象眼塊。或三十五十片。兩頭以紅繩紮之。成一把。外皮淡紅色。內腹皮白色。周身亦有豬鬃皮。此種皆柚皮。亦能消痰。又有一種爲世所重。每個五片如爪。中用化州印。名五爪橘紅。亦柚皮所製。較掌片爲佳。究之真者遠甚也。真化州橘紅煎之作甜香。取其汁一點入痰盂內。痰皆變爲水。此爲上品。○梁氏家藏蘇澤堂化州橘紅。每一個七破。反摺作七歧。曬乾。氣甚香烈。有橘紅歌云。石龍靈異不可測。首向青霄尾潛澤。有時聲吼洪如鵝。有時噴沙白似雪。鳴或宰相應期生。鳴或科甲蟬聯翼。由來州牧履其常。惟恐怪奇

駭愚俗。亭碑鼓吹。鎮其頭。重鑊壘石填其穴。天生靈異。無可憑。離奇屈曲。化爲橘。橘之爲性。溫且平。能愈傷寒。兼積食。消痰止嗽。功更奇。誰先辨此真龍脈。價值黃金。不易求。寄語人閒。休浪擲。

治痰症如神。消油膩穀食積。醒酒寬中。氣虛者忌服。解蟹毒。

慈惠編食蟹中
毒。橘紅煎湯服。

辰砂五香丸。治翻胃噎膈嘔吐。張氏祕效方。用血竭乳香沒藥辰砂各一錢五分。元胡一錢。化州橘紅一錢。共爲末。每三分酒服。

羊癩瘋。良方集要。雄黃天竺黃川貝母各五錢。真琥珀一錢。麝香一錢。陳膽星一兩。以上各另研。全蠍十四個。去足酒洗。遠志肉甘草汁製。鈎藤防風化州橘紅薑衣羌活茯苓天麻石菖蒲各五錢。以上不可見火。曬乾。蟬蛻三十個。白附子六錢。共爲末。煉蜜爲丸。如龍眼大。每服一丸。開水下。

按百草鏡。廣東高州府化州出陳皮。去白者名橘紅。今亦罕得。土人以柚皮代之。出售外方。價亦不貴。辨別之法。須先看皮色筋味。如皮皺粗色黃而厚。內多白膜。味反甜帶辛者。乃乳柑皮也。只堪點茶。不堪入藥。皮極厚而泡鬆。紋極細而色黃。內多膜無筋。味甜多辛少者。乃柚子皮也。性忌冷服。紋細色紅潤而皮薄。多有筋脈。味苦辛。入口芳香者。乃真化州橘紅也。入藥以此種爲貴。然其性酸削。能伐生氣。消痰雖捷。破氣損人。不宜輕用。近日有一種產仁和塘棲鎮蜜橘皮所製。曰甜橘紅。清香入肺醒脾。消痰之功。不下化產。而性不峻削。名爲香金板。南人體弱者宜之。○本草乘雅。武林棲水出蜜橘。凡數十

品名金錢穿心者。雖秀色可觀。又不如佛肚臍形。小皮癩。甘美可口。霜降采取。氣足味足。密藏至春。刮皮。肉脈破囊吮汁。亦可振醒精神。爲得句破疑之助。

橘瓢上絲

金御乘云。橘絲專能宣通經絡滯氣。予屢用以治衛氣逆於肺之脈脹。甚有效。綱目橘瓢上筋膜。只引大明治口渴吐酒。而沒其專功。何耶。因仍其說以補之。
通經絡滯氣脈脹。驅皮裏膜外積痰活血。

糖橘紅

仁和塘棲鎮者佳。以皮去白。切小塊。用糖霜製。

味甘辛。性溫。理氣快膈。治嗽消痰。食物宜忌。

橘餅

閩中漳泉者佳。名麥芽橘餅。圓徑四五寸。乃選大福橘蜜糖釀製而成。乾之。面上有白霜。故名。肉厚味重。爲天下第一。浙製者乃衢橘所作。圓徑不及三寸。且皮色黯黑。而肉薄。味亦苦劣。出塘棲者爲蜜橘餅。味差勝。然亦不及閩中者。又興化出金錢橘餅。乃取金橘製成。小如錢。明如琥珀。消食下氣。開膈。捷於砂仁荳蔻。又可醒酒。醉後點茶。尤爲妙供。

味甘性溫。下氣寬中。消痰運食。食物宜忌。黃疸臃脹。除膈止消。經驗廣集

治諸色痢。行篋檢祕。橘餅一兩。圓眼肉五錢。冰糖五錢。水二盃。煎一盃。露一宿。溫服。不露亦可。至重者不過二三服。無不神驗。

治瀉。梁氏集驗。夏月喫瓜菓太多。以致洩瀉不休。用漳州好橘餅一枚。細切薄片。作二次。放茶鍾內沖服。○橘餅湯。經驗廣集。治傷食。生冷瓜菓。泄瀉不休。橘餅一個。切薄片。放盃內。以沸湯潑蓋住。泡汁出。卽飲湯。連餅食。一餅可作數次服。

百菓酒。香櫞佛手各二個。核桃肉圓眼肉蓮肉橘餅各半觔。柏子仁四兩。松子三兩。紅棗二十兩。黑糖三觔。乾燒酒五十觔。浸此酒補虛益腎。乃河中李太守祕方。

藥製柑橘餅

北硯食規。用元明粉半。夏青鹽百。藥草天花粉白茯苓各五錢。訶子甘草烏梅去核各二錢。礪砂桔梗各三錢。以上俱用雪水煎半乾。去渣澄清。取湯煎柑橘。炭壘微火烘。日翻二次。每次輕輕細捻。使藥味盡入皮內。如捻破則不妙。能清火化痰。寬中降氣。

青鹽陳皮

百草鏡。製青鹽陳皮。卽蘇州宋公祠遺法也。陳皮二觔。河水浸一日。竹刀輕刮去浮白。貯竹筐內。沸湯

淋三四次。用冷水洗淨。不苦爲度。曬至半乾。可得淨皮一觔。初次用甘草烏梅肉各四兩。煎濃汁。拌曬。夜露。俟酥捻碎如豆大。再用川貝母去心四兩。青鹽三兩。研爲細末。拌勻。曬露乾。收貯。消痰降氣。生津開鬱。運脾調胃。解毒安神。

橘荅

橘樹上生。如木蓰。棗皮紅色。

治乳癰。煎酒服。

荳蔻檳榔

此卽綱目檳榔注內所云蒟子是也。形如雞心。一頭尖。一頭圓。僅如小指大。外有殼包之。殼白色如荳蔻形。尖如橄欖。長不及半寸。藥肆每於荳蔻中檢出。每荳蔻一觔。不過數粒。價亦倍。廣南檳榔亦無有專貨之者。或云。此種始爲雞心檳榔。廣南所市者。皆山檳榔。及大肚子而已。時珍循竺氏說。以山檳榔爲蒟子。恐誤。

治反胃噎膈。餘功與廣檳榔同。

按百草鏡。檳榔今藥肆所市者。形扁而圓大。乃大肚子。俗名雌檳榔。廣東文昌縣出者。名文昌子。尖小者。名主賜檳榔。又名喫子。其形長尖。狀如雞心。內有錦紋。又名雞心檳榔。卽雄檳榔也。另有一種雞心

檳榔。來自洋舶。從白荳蔻內揀出。極罕有。形亦長尖。極小。外有殼。儼如棗核。故又呼棗核檳榔。入藥最勝。

耳聾灸法。經驗廣集。用雞心檳榔一個。將臍內挖一窩如錢眼大。實以麝香。坐於患耳內。以艾炷灸之。不過三四次。即效。

小兒疳積。胡開甫方。史君子五個生。五個熟。荳蔻內檳榔。用薑湯磨汁。空心蘸史君子肉食。一二次即愈。

聾耳出膿。荳蔻檳榔爲末。吹入立愈。救生苦海

口瘡。荳蔻內檳榔煨存性。加輕粉敷之。廣果錄

瑣瑣蒲萄

出土魯番。北京貨之。形如胡椒。係蒲萄之別種也。回疆志。蒲萄一根數本。藤蔓牽長。花極細而黃白色。其實有紫白青黑數種。形有圓長大小。味有酸甜不同。一種色綠而無核。較黃豆微大。味甘美。一種色紫而小如胡椒。即瑣瑣蒲萄。一種色黑。形長寸許。一種色白而大。皆七八月熟。晾乾可致遠。○本經逢原云。瑣瑣蒲萄似蒲萄而瑣細。故名。生於漠北。南方閒亦有之。其榦類木。而係藤本。其子生青熟赤。乾則紫黑。能攝精氣。歸宿腎藏。與五味子功用不甚相遠。凡藤蔓之類。皆屬於筋。草木之實。皆達於藏。不

獨此味爲然。此物向供食品。不入湯藥。故本草不載。近時北人以此強腎。南人以之稀痘。各有攸宜。○五雜俎。西域白蒲桃。生者不可見。其乾者味殊奇甘。有兔眼蒲桃。無核。又有瑣瑣蒲桃。形如茱萸。小兒食之。能解痘毒。于文定筆塵云。瑣瑣卽馱娑之訛。○黎媿會仁恕堂筆記。瑣瑣蒲萄。于文定引西京羽獵賦。謂瑣瑣當爲馱娑。固屬附會。而以爲別有一種。亦非河西蒲萄。雖引根牽蔓。不異中土。而結實大。長如馬乳。色深紫。味亦殊甘。一枝千百顆。大者在上。細在下。垂取而乾之。大者爲白蒲萄。細者名瑣瑣。非兩種也。故俗呼爲公領孫。惟綠蒲萄則來自西域。非中土所有。

味甘。核細微鹹。○痘學真傳云。味甘酸。性平溫。○百草鏡云。性熱。入脾腎二經。作酒彌佳。治筋骨溼痛。利水甚捷。除遍身浮腫。痘瘡不出。酒研和飲。神效。

強腎。瑣瑣蒲萄。人參。各一錢。火酒浸一宿。侵晨塗手心。摩擦腰脊。能助腎力強壯。若臥時。磨擦腰脊。力助陽事堅強。尤爲得力。

稀痘。瑣瑣蒲萄一歲一錢。神黃豆一歲一粒。杵爲細末。一陽夜。蜜水調服。并擦心窩腰眼。能助腎祛邪。以北地方物。專助東南生氣之不足也。然惟稟質素弱者用之有益。若氣壯偏陽者。勿服。恐其助長淫火之毒也。

按紫桃軒雜綴。瑣瑣蒲萄。神農九草之一。中土久有。不俟博望從西域帶來也。吾里東塔朱買臣。慕有

之。戊子。余曾歷平湖幕署。有一枝蔓延滿架。夏開瑣碎花。結實如菉豆。望不可見。吾杭螺螄山汪姓家。亦有此。然食之味薄。不若甘肅者味厚也。入藥自宜以西北者爲優。

南棗

山棗
藏棗

山金華東陽縣茶場。以透明如血。七枚長一尺者佳。陳者入藥。○宦遊筆記。金華東陽縣茶場出棗。其大如拳。核尖細如黍。決之卽脫。清甘香脆。以此名聞天下。明中葉尙存數柯。今此種已絕矣。惟東南諸鄉於高阜地種之。雖不及茶場。亦美甲於他處。其製法不一。未熟輒擊。以湯沃之。使變色。謂之湯紅。乾則其色紫。已熟者名樹頭紅。乾則其色丹。過熟者。以所煮餘汁煮之。色味似蔗糖。謂之糖棗。此則以時食爲美。不作乾也。又有一種棘。差小而圓。味殊勝棗。○物理小識。南棗出蘭溪。搖而知之。其肉離核。味甘微酸。性溫補。赤入心。酸斂肝。

博記單方。眼疾中有一種名紅線鎖目。乾治法。取南棗核二十一粒。將核截兩斷。去仁淨。以銅綠塞孔中。仍將棗核合上。以紙貼封一起。放爐中燒紅。取出。以盥蓋存性。每日只用七個。研極細末。調生男乳水抹。三日立效。

腸紅下血。南棗五枚。同黃芪二錢。煎湯。五更服。神效。○又方。不藥良方。南棗十枚。槐米一兩。同煎。去米食棗。日三次卽愈。

痔瘡。 救生苦海。 南棗一枚。 去核。 鼈頭骨一個。 搗碎。 銅青裝滿棗肉。 紮緊。 火煨烟盡。 伏土存性。 研細。 用秋海棠煎洗。 然後用藥和水敷之。 三日消。

除壁蝨。 集聽。 大南棗去核。 入水銀。 火煨熏。

走馬牙疳。 不藥良方。 陳年南棗核。 燒灰。 研末。 摻之。

棗參丸。 醒園錄。 用大南棗十枚。 蒸軟。 去皮核。 配人參一錢。 布包。 藏飯鍋內蒸爛。 搗勻。 爲丸。 如彈子大。 收貯用之。 補氣最捷。

仙果不饑方。 醒園錄。 大南棗一觔。 好柿餅十塊。 芝麻半觔。 去皮炒。 糯米粉半觔炒。 將芝麻研成細末。 棗柿同入飯中。 蒸熟。 取出。 去皮核子蒂。 搗極爛。 和麻米二粉。 再搗勻。 爲丸。 曬乾收貯。 加參更妙。

本經逢原云。 古方中用大棗皆是紅棗。 取生能散表也。 入補脾藥宜用南棗。 取甘能益津也。 其黑棗助溼中火。 損齒生蟲。 入藥非宜。

山棗

出廣西肇慶府。 葉如梅。 果似荔枝。 九月熟可食。 ○柳貫打棗譜。 山棗狀如棗而圓。 色青黃而味甘酸。 出

廣州

甘溫無毒。 生和脾胃。 益血壯神。

藏棗

朱排山柑園小識。藏棗來自西藏。實產於天竺。大者長二寸許。形味絕似南棗。能補氣。功同人參。藏中亦不易得。其核似蠶蛹形。而無仁。

補虛勞。定神志。治怯如神。

落花生油

一名長生果。福清縣志。出外國。昔年無之。蔓生園中。花謝時。其中心有絲垂入地結實。故名。一房可二三粒。炒食。味甚香美。康熙初年。僧應元往扶桑。覓種寄回。亦可壓油。今閩省產者。出興化爲第一。名黃土。味甜而粒滿。出臺灣。名白土。味澀而粒細。其油煎之不熟。食之令人瀉。一名土豆。○彙書。近時有一種名落花生者。莖葉俱類荳。其花亦似荳花。而色黃。枝上不結實。其花落地。卽結實於泥土中。亦奇物也。實亦似荳莢。而稍堅硬。炒熟食之。作松子之味。此種皆自閩中來。○物理小識。番豆名落花生。土露子。二三月種之。一畦不過數子。行枝如蕪菜。虎耳藤。橫枝取土壓之。藤上開花。絲落土成實。冬後掘土取之。殼有紋。豆黃白色。炒熟。甘香似松子味。又云。番豆花透空入土。結豆。當通潤臟腑。○酉陽雜俎。又有一種形如香芋。蔓生。藝者架小棚。使蔓之。花開亦落土。結子如香芋。亦名花生。○花鏡。落花生一名香芋。引藤蔓而生。葉極開小白花。花落於地。根卽生實。連絲牽引。土中纍纍不斷。冬盡掘取。煮食。香甜。

可口。南浙多產之。○萬歷仙居縣志。落花生原出福建。近得其種植之。○嶺南隨筆。花與葉不相見。爲換錦花。莢與蒂不相見。爲落花生。種法以沙壓橫枝。則蔓生。花不生莢。其莢別在根莖間。亦稱落花生。○逢原云。長生果產閩地。花落土中卽生。從古無此。近始有之。味甘氣香。能健脾胃。飲食難消運者宜之。或云與黃瓜相反。予曾二者並食。未蒙其害。因表出之。花生殼。韓柳生云。焙研極細末。著人身體。沾肉卽生奇癢。○敏按劉啓堂經驗祕方。長生果一名落花生。又名落地生。不可與黃熟瓜同喫。喫則立死。黃熟瓜卽香瓜。非長而白色。可以醃喫之。黃瓜也。始知俗傳之誤。○雨蓑翁食物便覽。香芋一名落花生。久服多男。

多食治翻胃。然其性能動火生痰。常人只宜少喫。從新云。辛甘而香。潤肺補脾。和平可貴。食物宜忌云。性平。味甘。舒脾。廣志云。暖胃。藥性考云。生研用。下痰。炒熟用。開胃。醒脾。滑腸。乾嗽者宜餐。滋燥潤火。按落花生。乃花謝落土。感土氣而成實。故有入脾和胃之功。又能通肺氣。曾見興化令王翁一子。酷嗜此物。後患軟癱。豈非動火生痰之明驗歟。近見人以花生入糖湯煮。浸醬油入素供。更爲生痰。老人尤不宜多食。

俞友梁有烏鬚簡便方。止用落花生淨肉。炒極焦黑。研極細。撚鬚。一二日後。色黑如漆。

四日兩頭瘡。卽三陰癰。

安定臣云。昔曾患此。諸方莫療。有人教服炒熟花生。每日食一二兩。不半月而愈。

玉神庵尼清慧。言花生人云服之生痰。有一大家婦咳嗽痰多。醫束手不治。庵尼雲上勸服花生。每日食二三兩。漸覺稀少。不半年。服花生二十餘觔。咳嗽與痰喘皆除。想亦從治之法也。童鹿菴言花生本有滌痰之功。予家凡患咳嗽。止用花生去殼膜。取淨肉沖湯服。咳嗽自安。豈非化痰之功。善於瓜羹貝母。世俗以火炒食。反能生痰。又凡被馬踢傷者。忌服花生。服之瘡愈增痛。

核桃油

花生油 一名果油。色白甘平。氣腥。滑腸下積。膩膈生痰。

阿月渾子

好者補火。若壞核桃榨取者。有毒味劣。不宜食。

薯良

與榛子同類。性更溫良。能止痢。煖腎。開胃。除腸穢積。得木香山莢。能興陽。

無漏果

形如柚圓。蔓生。紅色。浸酒服。能活血。藥性考

此卽海欖。乃鳳尾蕉之子。或稱爲棗。實非棗也。以刀剝去青皮。石灰湯淪之。蜜浸瓶封。可久藏。寄遠不壞。

味甘美。性溫。消食寬中。除痰止嗽。益氣潤顏。久食令人肥美。
脾大海

出安南大洞山。產至陰之地。其性純陰。故能治六經之火。土人名曰安南子。又名大洞菓。形似乾青菓。皮色黑黃。起皺紋。以水泡之。層層脹大。如浮藻然。中有軟殼。核殼內有仁二瓣。

味甘淡。治火閉痘。服之立起。並治一切熱症勞傷。吐衄下血。消毒去暑。時行赤眼。風火牙疼。蟲積下食。痔瘡漏管。乾欬無痰。骨蒸內熱。三焦火症。諸瘡皆效。功難盡述。

藕粉節

冬日掘取老藕。擣汁澄粉乾之。以刀削片。潔白如鶴羽。入食品。先以冷水少許和勻調。次以滾水沖入。卽凝結如膠。色如紅玉。可愛。加白糖霜摻食。大能和營衛生津。綱目藕下止載澄粉作食。輕身延年。而不知其功用更專益血止血也。凡一切症。皆不忌。可服。養餘月令。有澄藕粉法。取粗藕不限多少。洗淨截斷。浸三日。每日換水。看極淨。漉出。搗如泥。以布絞淨汁。又將藕渣搗細。又絞汁盡。卻輕濾去渾脚。以清水少和攪之。然後澄去清水。下卽好粉。曬乾收貯。和糯粉白糖蒸食之。或以白糖開水沖服俱可。菱粉芡粉俱用此法。

味甘。氣芬芳。性平。調中開胃。補髓益血。通氣分。清表熱。常食安神生智慧。解暑生津。消食止瀉。

節粉。出淮安寶應一帶多有之。乃藕節搗澄取粉曬乾。其價較藕粉數倍。

味甘微帶苦。性平。開膈補腰腎。和血脈。散一切瘀血。生一切新血。產後及吐血者食之尤佳。

宦遊筆記。淮以南皆澤國。居人蒔藕。暇則濾爲粉。淘汰既淨。去其渣滓。存其甘液。風吹日曝。漸成碎珠。以湯沃而食之。純任天然。別有風味。亦野物之可尙者矣。尤著名者曰片粉。擇藕之極佳者淘曬。人工十倍尋常。及其既成。則如白雲片片。纖塵不染。味亦絕勝。非大力者不能製也。

八仙藕粉。經驗廣集。此粉滋胃保元。治一切虛勞雜症。白花藕粉。白茯苓。白扁豆炒。蓮肉。川貝母。山藥。白蜜。各等分。人乳另入滾水沖。不拘時食。

人紅丸。濟世養生集。專治童子勞怯。神驗之極。用人龍二十一條。即虻蟲。童便洗淨。瓦焙勿令黑。研末。不破皮紅棗三

十個。飯上蒸熱。去皮核。蘿菔子一錢五分。炒研。大熟地五錢。煮爛杵膏。真藕粉一兩五錢。研。真川連六分。酒拌

炒。研末。右將紅棗肉熟地膏和諸藥末搗勻爲丸。如桐子大。每早以白滾湯送下七粒。逐日加增二粒。至二十一粒止。以後不必再加。服一料全愈。予屢試皆效。切勿泛視。

菱粉殼蒂

湖州府志。菱本兩角者。有果菱。差小。有湖趺菱。色紅而大。有青菱。色青角曲而利。四角者野菱。最小者角極鈎。有泰州菱。實豐而美。近又有無角者。名餛飩菱。德清有雞腿菱。文武菱。

菱有多種。老則皆可爲粉。造粉之法。與造藕粉同。食菱粉而腹脹者。用薑湯或酒解之。

補脾胃。強脚膝。健力益氣。耐飢行水。去暑解毒。

蒂。疣子。俗名飯餠。用鮮水菱蒂搽一二次。卽自落。

殼。治頭面黃水瘡。醫宗彙編。隔年老菱殼燒存性。麻油調敷。卽愈。

無名腫毒。販翁醫要。老菱殼燒灰。香油調敷。卽愈。并治天泡瘡。

指生天蛇。醫宗彙編。以風菱角燈火上燒灰存性。研末。香油調敷。未潰者卽散。已潰者止痛。立愈。

治脫肛。張氏必驗方。先將麻油潤溼腸上。自去浮衣。再將風菱殼水淨之。卽刻縮上不脫矣。

芡粉

嘉泰會稽志。芡一名雞頭。山陰梅市產之最盛。有數等。小白皮最佳。大白皮中。白皮其皮甚堅難齧。齧者太軟。皆不逮也。造粉與藕菱同法。

益精氣。強智力。靈耳目。固精添髓。養餘月令

九龍丹。販翁醫要。治腎水不足。邪火淫動。遺精淋濁等症。枸杞子酒蒸。金櫻子焙。山楂肉炒。石蓮肉炒。蓮鬚焙。熱地搗膏。芡粉炒。白茯苓當歸等分。共爲末。煉蜜丸。如桐子大。每服三錢。空心白滾湯下。

